

Q. D. R. E. J.

De

Successione Principum, aliarumq; personarum Illustrium patricia & anomala, quæ fit per

# Confraternitatem,

Dissertationum Nomico-Politicarum

S E C U N D A,

Qua

THEMIDI spectanda Confraternitas  
sistitur,

PRÆSIDE

NICOLAO MARTINI, JC.

Nov. & Polit. Prof. Ord. Acad. h. t. Pro-  
Rectore Magnifico, & Facult. Juridicæ

Decano,

RESPONDENTE

EVERHARDO BUNTEN,


Bielefeld. Westphalo.

*In Auditorio Majore, ad diem 1. Augusti.*

---

K I L O N I,

Excud. Joach. Reuman, Acad. Typogr. Anno 1674.



Successione Principum, etc.  
et de successione Principum, etc.  
et de successione Principum, etc.

# Constitutionum

et de successione Principum, etc.  
et de successione Principum, etc.  
et de successione Principum, etc.

et de successione Principum, etc.  
et de successione Principum, etc.  
et de successione Principum, etc.

## OLAO MARTINI

et de successione Principum, etc.  
et de successione Principum, etc.  
et de successione Principum, etc.

et de successione Principum, etc.  
et de successione Principum, etc.  
et de successione Principum, etc.

et de successione Principum, etc.  
et de successione Principum, etc.  
et de successione Principum, etc.

VIRO  
NOBILISSIMO, EXCELLENTISSIMO<sub>2</sub>  
DOMINO,  
DN. FRANCISCO  
MEINDERS, Jcto.

Serenissimo ac Potentissimo Electori  
Brandenburgico, &c. &c. &c. à Consiliis Status  
& Belli Secretioribus,

*Dn. Mæcenati & cognato suo  
multis nominibus venerando,*

hanc

de CONFRATERNITATE  
Dissertationum Nomico-Politicarum secundam,  
*câ, qua par est, observantia*

D. D. C.

RESPONDENS.

VIRI

WOLFGANG, EXCELSIOR

DOMINO

DR. FRANCISCO

MTINDERS, JCO.

SCHULTE, JCO.

BRUNNEN, JCO.

DE

DR. HENRI

DE

DE


DE

DE

DE

DE

RESPONDENS



## I. N. 7.

Th. 1.

**C**onfraternitatis in se consideratæ naturam, tum causas & affectiones, quæque præterea generalioris circa eandem sunt *hæreas*, uti præcedens exhibuit dissertatio; sic præsens Themidi spectandam sistet, h. e. ad æqui & rectæ normam seu regulam propius exiget. Nimirum, quia legibus Romanorum civilibus (quas uti juri, quod naturale vocamus, quam maxime nonnulli putant convenientes, ita communes passim Orbis agnoscit *Europæus*) successiōnū duæ tantummodo species, legitima videlicet ac testamentaria, cognitæ fere sunt; inquantum juri isti, quod aliquem inter gentes, cum primis *Europæas*, usum obtinet, siue scripto, siue non scripto, conventionalis hæc, de quâ sermo est, successio conveniat, ut inde de pactiōis hujus, & provenientis ex illa successiōis, justitia, constet, accuratius inquiremus. Quod cum sublimioris, neque cuivis obvix sit indaginis, altius erat paulo ascendendum, deque Juris, ad quod, velut ad normam quandam notionalem, confraternitatem diximus exigendam, crymo, variis acceptionibus, præprimis ea, quæ præsentis est negotii, illius natura, principiis & affectionibus, late tractandum. In quibus omnibus, tanto nobis hic esse brevioribus licebit, quo solidiora de illis alibi, cœptis annuente Deo, tradentur.

II.

Juris vocem rebus diversis tribui, nec illos amplius latet, qui prima nondum in legali studio stipendia meruerunt; nec operæ precium facere illos proinde existimo, qui in varias ejus significationes, multis, ac operose, pluribusque paginis, in primo spectiminum suorum frontispicio inquirunt, & cramben hanc vel milles coctam lectori erudito vel ad nauseam usque recoquunt. Nobis in illo sensu jam venit, quo *H. Grotio de I. B. l. i. c. i. n. 9.* usurpatur, & cum lege idem denotat, seu quendam legum dicit complexum. Tali modo sumpta voce, Ju- de-

A

scrib



scribi potest, *decretum superioris, continens regulam, ad cuius præscriptum, actiones quasdam morales institueret inferior, sub obligatione pene, violationi legis imminenti, jubetur.* In naturale ac voluntarium (*νομιμὸν* vocat Arist. *5. Eth. c. 7.*) ius ita acceptum dividi, controversiam non habet inter eruditos. Quam bimembrem divisionem sufficere putant & illorum nonnulli, qui gentium aliquid ius, naturale contradistinctum, quodque hoc nomine proprie veniat, agnoscunt. Naturale non unius gentis aut populi, sed totius generis humani civitatem respicit: ac omnes adeo homines ad sui observantiam, ex natura objecti, obligat. Quæ verba, juris huius, à cæteris juris speciebus, discrimen insigne satis indicant. Formale in convenientiâ aut disconvenientiâ (sic loquitur *Grotius c. a. l. §. 10.*) cum recta ratione, aut naturæ rationali cernitur, unde nec in bruta cadere posse, nisi vocem juris in sensum velis ignobiliorem detorquere, quicquid pro jure bestiali *Hieronymus Rorarius*, aliique contendant, qui sunt inter juris privati Consultos, reliquis accuratiores, facile largiuntur. Quodam verò sit convenientiæ ac disconvenientiæ illius fundamentum, rectius alibi docebitur.

### III.

Actus, de quibus ius hoc constituit, tales sunt, ut in se spectati, debiti sint vel fieri, vel omitti: *qua nota ius hoc distare, non ab humano tantum jure, sed & divino voluntario, loco ante laudato Grotius monet.* Unde non ineleganter, *juris naturalis obligationem à naturæ objecti oriri, & inde se diffundere in præceptum, dixit Ludov. Mol. de J. & J. tract. 1. disp. 4.* Quæ sit ejus probandi ratio, tum subtilior, tum popularior altera, paulo post explicabimus.

### IV.

Alterum ius dicitur legitimum, Græcis, uti diximus, *νομιμὸν*, quod idem nonnullis audit voluntarium, ed quod à voluntate legislatoris præcipientis vim obligandi accipiat. Voluntas illa cum sit vel divina, vel humana: duplex inde ius voluntarium enascitur; divinum scilicet humanum. Illud quamvis cum jure naturæ confundere, sit nonnullis perquam solenne; ab eo tamen aliquo discrimine internosci, curateque distingui, ad multa refert. Nobis denotat *decretum legislatoris Dei à voluntate ejus absoluta vim trahens obligandi illos, quibus est latum.* Quæ datæ definitionis nostræ verba, siquidem

dem rectè habent, quomodo à jure, quod naturale dicimus, hoc differat, clare satis ostendunt. Versatur jus hoc circa tales actus, qui antequam vel fieri vel omitti à DEO jubeantur, licite vel fieri vel non fieri poterant, quique seposita voluntate divina, secundum se spectati, vix quicquam continent ejusmodi, propter quod fieri illos aut omitti sit præcise necessum. De hoc jure divino voluntario diligenter tractat *Grotius de I.B. l.1.c.1. §. 15. & seqq. ad usque finem capituli*; in quibus aliqua non abs re forte desideraveris; quæ cum ad Theologorum spectent examen, huc trahi temere non debent. Nobis jam quidem sufficere potest, juris istius naturam, rudi, quod ajunt, Minerva, delineasse. Dividitur *H. Grotio c. a. l.* & recte quidem, in illud quod omnes homines obligat, & quod uni est populo peculiariter à Deo datum.

## V.

Humanum trimembri divisione, in civile, latius patens, & rectius, dispescit *Grotius c. l. §. 14.* singula quoque divisionis istius membra dilucide satis explicat. Quam quidem sententiam suo nunc loco relinquemus, alibi de toto hoc negotio fufius & solidius disserturi. Nos uti præter jus illud, quod singulorum populorum dicitur, aliud Voluntarium humanum non agnoscimus; Ita de illo, quod Gentium nonnulli usurpant Jcti, ac naturali & civili contra distinguunt, ut pote non ente, quod dicamus, non habemus.

## VI.

Civile, quod & proprium vocatur, *§. 1. Inst. de I.N. G. C. & l. 6. §. de l. & l.* est, quod *qualibet perfecta societas, juris fruendi & commodi ergo congregata, aut qui in illa societate jus habes, constituit, suisque præscribit.* Hujus à naturali, ac Divino voluntario, discrimen adeo est evidens, ut multis illud ac operose subindicare, soli fuerit lumen scenerari. Verbo tantum venit hic notantum, quemadmodum, qui jus illud constituunt, populi. sunt alii alii nobiliores ac cultiores, ita civitatis unius leges, alterius legibus merito præferri; inter omnia vero Jura, illud, quod Romanorum civile vulgo dicimus, cultioris Europæ moribus, principatum, per plura jam secula obtinere.

His in primo dissertationis hujus secundæ limine, de jure, ejusque differentitiis, ac *ἐν τῶν πόδων* prælibatis, ad rem propius nunc accedemus, an *ἢ* in quantum juri vel naturali, vel voluntario, conveniens sit, aut ab alterutro, vel utroque dissideat pactum, confraternitatis, cura haud perfunctoria investigaturi. Ab illo, quod dignius est, & unâ cum genere humano cœpit, primam ab ipso DEO originem trahens, jure, naturali videlicet, orsum formabimus. Huic, an *ἢ* q̃ congruat pactum successorium, rectius ut perquiratur, ad quatuor potissimum fuerit respiciendum. Primum est; *quomodo nobis innoscatur, esse aliquid aut juri naturali consentaneum, aut cum eo pugnare*; quod quidem nosse accurate, tum ad multa alia, tum præmunire ad cætera viz, nobis in præsentē haud parum prodest. Alterum; *an pacti hujus hæc sit natura, ut alterius teris pacto non comprehensum ladeat*, idque per se, non vero per accidens, ut scholæ loquuntur. Tertium; *quantum domini voluntati, in disponenda hereditate tribuatur jus nature, & an quoad alius alienativos, aliquam inter bona alicujus omnia h. e. jus universum, aut illorum partem, & res singulas differentiam, ius idem constituat*? Et ista quidem tria ad primam pertinent quæstionem. Quartum denique & ultimum, quod ad posterioris quæstioni facit epodationem, est, ut personis pactum hoc mutuo ineventibus, ut & illis, quarum interesse quovis modo poterat, solícite consideratis, *quousque juri huic conveniens sit*, expendatur. Singula nunc breviter excutienda.

## VIII.

Primum quod attinet; quia præter Decalogum, breve quidem illud, sed exactum legis naturæ compendium, nullæ exstant scriptæ tabulæ, quibus illa, quæ juris hujus sunt, probentur; factum exinde fuit, ut, quæ ad jus illud spectant, aut prorsus ignoraverint quam plurimi, aut inutilibus disceptationibus magis implicita reddiderint quam expedita. Quin, eò delapsi sunt absurditatis nonnulli, ut aliquod ejusmodi jus omnino dari, præfæcte negarint. In quorum familia facile princeps est Carneades, is, qui, dicente Grotio in *Præleg. de I. B. & P. ad id pervenerat, quod Academicæ suæ summum erat, ne pro falso non minus, quam pro vero, vires eloquentiæ posset incendere*. Cui sententiæ, (quam & Aristippus, eumque secuti Cyrenæici, cetera



teste *Diog. Laert. l. 2. in Aristipp. & Epicurus*, ut habet *P. Gassendus in Philof. Epicur. sovetunt* ) non falsæ tantum, cæu docet eleganter *L. 4. Bant. Firm. div. Inst. l. 5. c. 12.* sed & impiæ, hodiernis adhuc dum temporibus, in tanta eruditionis luce, inter Christianos, suffragari nonnullos, hoc magis videri mirum debet, quo major è revelato Dei verbo lux affulsit. Sed hæc aliud spectant. Quomodo probetur, esse aliquid juris naturalis, nec ne, adeoque cum illo aut convenire aut pugnat, nobis est inquirendum. Ad fontem digitum intendit doctissimus *Feldenus Elem. Jurispr. Univers. pars. 1. c. 5.* Nec desunt alii, qui novas ejus investigandi vias invenire alleborarunt. Lumen scrutantibus accendit *H. Gratius de I. B. l. 1. c. 1. §. 12.* duas illius probandi rationes adducens, quarum altera subtilior, popularior altera dicitur.

#### IX.

Illæ rei alicujus cum natura rationali aut sociali convenientiam, aut disconvenientiam necessariam ostendit; quæ uti plus artis ingenique requirit, ita dubio procul, altera illa longe quoque certior est ac firmior. Quicquid itaque societati civili ordinatæ, qualem natura appetit, cujusque vinculum jus est, conservandæ, per se conducere, prædicto judicio percipiunt homines, neque institutum aliquod humanum deprehendunt, juris naturalis esse firmiter colligetur. Contra verò, quicquid istam societatem dissolvit, ac destruit, aut ut rectius loquar, naturæ societatis repugnat, juri quoque naturali militare, est omnino putandum. Quænam vero sint illa, quæ societati ita ordinatæ, ejusque naturæ repugnant, exacte designare, non est, nisi illiusdemum, qui societatis humanæ conditionem ac naturam habet intimius perspectam.

#### X.

Huic societatis, non cujuslibet, sed excellentis, appetitui, rectæ rationis judicium, ac voluntatem divinam mentibus inscriptam, in Decalogi tabulis repetitam, neque uno in Scripturis loco declaratam, postea *Grotius* jungit. Ad rectæ rationis normam exigenda, quæ juris hujus censentur, nullum est dubium; neque proinde tamen juris naturalis origo vere vocabitur recta ratio, quæ, quid in actibus hominum moralibus justum sit, quid injustum, dicat quidem; iste tamen dictatus neque imperium est, neque debitum aut fieri aut omitti vi sua efficit, sed ex principis certis, ac irrefragabilibus, & lumine naturæ colligit, ac declarat, actum aliquem menti & voluntati divinæ, in sanctitate ejusdem fundatæ, aut conformem esse, aut eidem

repugnare, quodque consequi hinc necessum est, ab Autore naturæ Deo, talem actum vel vetari vel præcipi. Quæ quidem si vera sunt, fontem juris naturalis ac originem unicam, Dei Opt. Max. voluntatem, in sanctitate & justitia ejus fundatam, ad societatis humanæ perfectioris conservationem tendentem, de quâ internum intellectus nostri judicium recte conformatum testetur, dicere quid prohibet? Respexisse eò videntur Chrysippus & Stoici, qui juris originem non aliunde potendam, quam ab ipso Jove dicebant. vide *Grot. in Proleg.* & quos in *Annot.* citat *Autores.* Quoties itaque actus alicujus aut convenientia aut disconvenientia cum mente ac voluntate divina, rectæ rationis dictamine præeunte, ostenditur, toties aliquid juri naturali vel consentaneum, vel ab eo discrepans probatur.

## XI.

Altera jus naturæ probandi ratio popularior ( inartificialem Rhetores dicerent ) quemadmodum plus habet laboris & lectionis, ita minus ingenii judicii que requirit. Testes hæc producit gentes, si non omnes, saltem moratiores omnes, illarumque circae, quæ juris dicuntur naturalis, consensum. Huic probandi modo non multum deferre videtur *Jan. Seldenus de I.N. & G. l. 1. c. 6.* Hebræorum pro se laudans institutum, qui gentium aut omnium aut complurimorum moribus, opinionibus, constitutionibus, jus naturale non metuebantur. Sed & ipse *Grot. l. 1. c. 1. §. 12.* haud aliter ferme videtur judicare, quando non certissima fide, sed probabiliter colligit, juris esse naturalis id, quod apud omnes gentes, aut moratiores omnes tale esse creditur. Quam minime certus autem sit hic procedendi modus, pluribus, siquidem nobis id agere decretum foret, haut multo labore posset ostendi. Quia enim primo certissimum est, gentes aliquot integras, non in multis tantummodo capitibus, & partibus, jus illud olim violasse, sed integrum quoque pravis moribus & consuetudine perversa, delevisse, ab illis vix sanè quicquam expectes. Consulendæ sunt, inquit, illæ, quæ reliquis apparent moratiores. Jamjam respondebitur. Deinde quia præcepta juris istius vel principia sunt, vel conclusiones, eæque aut prompte & citra difficultatem ab indoctis etiam, ex illis principiis deducantur, aut difficilius & ab eruditioribus demum per discursus & ratiocinationes alias ex iisdem principiis inferantur: sive principia ipsa, sive conclusiones spectes,  
cur

cur isto ad consensum gentium recursu sit adeo opus, vix invenies. Principia illa; cum pauca sint, & ob sui evidentiam, quod principii proprium est, ab omnibus, qui terminos intelligunt, vera esse agnoscantur, de illis gentium colligere suffragia, cui bono fuerit? Conclusiones, evidentiores præsertim illas, quod attinet, cum plusquam sit verissimum, non eadem, ut *Nepos Cornelius alicubi* loquitur, omnibus esse honesta aut turpia, quinimò gentes etiam pro cultissimis olim habitas, moribus circa ea, quæ tali modo juris sunt naturalis, dissidere; quis in tanto populorum dissensu, vel leve aliquod indagandæ veritati paratum esse præsidium putabit? Græcos reliquum omne quod erat mortalium, nec ipsi Romanis ab hoc censu eximiis, turpi barbarorum cognomine infamasse, quis est qui nesciat? Idem ut & Romani, Ægyptios, artium doctrinæque reconditæ laude imprimis conspicuos, ob superstitionem ridebant. Hebræos vero, electam DEO gentem, propter ritus quamplurimos in sacris usitatos, cum primis ob circumcisionem tamen, ab ipso Deo imperatam, non tam contemnebant, quam execrabantur. De posterioris generis conclusionibus, ut agatur, operæ precium nequaquam puto mereri, cum circa illas suis institutis adhuc magis variant gentes.

## XII.

Hactenus dicta, quam male rutum sit, gentium consensui plus æquo tribuere, faciunt manifestum. Quibus tamen hanc probandi, aut ut castigatius dicam, plurium gentium suffragiis, ea, quæ juris naturæ sunt, declarandi, viam, quam nullus, ut arbitror, eruditorum, simpliciter improbaverit, placet insistere, Philosophorum principis Aristotelis autoritate se possunt etiam tueri, qui jus naturæ plus semel à posteriore describit, *quod ubique eandem vim obtinet s. Ethic. c. 7.* modo id fiat in subsidium, melioribus ac fortioribus argumentis, quæ nunquam militant ignobilioribus, in primâ certaminis acie collocatis. Illud interim non possum non audaçer profiteri, plus conatus & pompæ, quàm triumphi, inferculis ostentare videri, qui juris naturæ præcepta, vel ab Indorum Gymnosophystis, vel à Sinenfium Confucio, vel Japonensium Bonziis, è remoto barbarorum hominum aëre, in puriorem accersunt Europæum. Quasi vero magni moliminis res sit, ex autoribus in vulgus etiam non ignotis, testimoniorum hinc inde centones compilare, aut præter laborem aliud magnopere desideret. Sed quor-

quorū pro labor? Maneat firmum, qui scopus nostri huius discursus est unicus, per illas ē lumine rectæ rationis, eque principiis certis deducas conclusiones, quæ juris sunt naturalis, omnium certissime probari.

### XIII.

Ad hanc porro normam semel à nobis constitutam, pactum confraternitatis nunc erit diligentius expendendum. Pacisci cum altero, de re aut negotio quopiam, prout in se spectatur actus ipse, ex illorum genere est, quæ licita ac humani arbitrii libertati sunt concessa. Quemadmodum vero in actibus aliis, ita in hoc quoque fieri potest, ut libertati ceteroquin naturali, ponat impedimentum quoddam morale, aut conditio personæ, aut res vel factum aliud in conventionem deducendum. Quod personæ conditio ponit impedimentum, vel ætas rebus administrandis impar, vel aliqua mentis infirmitas, vel potestas, cui quis subest, efficiunt. *Ætas*, quæ nihil aliud hic est, quam *mensura temporis illius, quo quis fuit in vita*, quoad præsens negotium, in minorennem, & maiorennem non incommode dividetur. Quando designat minorennitas, cum non præcise designat jus naturæ, non uno modo suis institutis videas hic incedere gentes: hæc longius, aliæ brevius minorennitati spacium præscribunt. *Ætatem* in paciscentibus talem naturæ jus requirit, quæ vere possit consentire, ac plenum habeat rei gerendæ intellectum; cætera legislationis humanæ arbitramento liberius deterrminanda permittit.

### XIV.

Mentis infirmitas, quæ quidem talis est, ut consensum prorsus exterminet, quin paciscendi libertati ponat impedimentum, dubitari minime potest. Recte *Gaius I.C. l. 1 §. 12 ff. de O & A. furiosum sive stupilem, sive promittat, nihil agere, natura manifestum esse*, pronunciavit; adde *l. 5 ff. de R. J.*

### XV.

Ratione potestatis quoque fœcunum injici libertati, pervulgatum est. Potestas *jura persona in personam, non propriam, sed alienam, notat, illius libertatem augens, huius vero diminuens*. In publicam & privatam dispesci, notius fere est, quam ut indicari mereatur. Publica vocatur imperium, quod est aliud *κατὰ νόμον*, ut *Philosophus* loquitur, h. e. *legibus adstrictum*, aliud *ἀντινόμον* s. *absolutum*.

PRIVAT.



Privata patriam, dominicam, conjugalem, tutoriam denique ac eratoriam species formatur. Quomodo in illis, qui publicæ alterius potestati subsumunt, distingui circa pactum hoc confraternitatis ineundum debeat, dissertatione prima fuit edisserutum. Qui privato alterius imperio subiecti sunt, eo minus ad pactum hoc debent admitti, quo magis illorum, in res ac bona dominium, legibus non civilibus tantum, sed ipsi etiam naturalibus est restrictum, & limitatum.

XVI.

In rebus, quatum proxima est inspectio, ne de illis paciscendi libertas impediatur, nihil hactenus desiderare juris naturalis simplicitas videtur, quam ut I. res illæ promiscuo hominum commercio, quoad jus illas occupandi, sibi que habendi, non sint exemptæ; quales, si intra solius juris huius terminos se contineas, illæ sunt, & quidem solæ, quæ, ut Neratium *JC. l. 14. ff. de A.R.D.* nonnulli capiunt, *anatura ad omnium hominum usum prodita, in nullis adhuc dominium pervenerunt.* Adde, quæ nos contra *Auberium part. 1. c. 1. §. 5 sub finem* de rebus istis diximus. II. Ut paciscentium dominio, siue pleno, siue restricto, res illæ subsumunt: nam quod de rebus alienis, quod & ipsæ in pactum deduci interdum queant, *JCtorum* nonnulli tradunt, suo loco relinquimus, neque huc pertinet. Quia enim pacto confraternitatis id agitur, ut jus aliquod, in rebus conventionem expressis, alter consequatur; & vero res alienæ sint extra meam potestatem, sequitur exinde, frustra mecum pacisci alterum, ut actu meo, jus aliquod circa res illas sibi constituatur; juxta regulam pervulgatam, quæ vult, ut nemo plus juris in alium transferat, quam ipse habet. III. Ut in rebus illis non habeat tertius aliquis pacto non inclusus, jus aliquod legitime quæsitum, quod adversus ipsum valeat paciscentem [ huc enim præcipua difficultatis istius alterius summa redit ] &, quod qui lædit, injuriam faciat, quæ læso det actionem in foro humano, cujus inter diversas gentes, illarumque Rectores, vicem occupat bellum. Verum de illo jure mox plenius. De fœminis etiam, quæ pacto hoc lædi quam maxime videntur, & illarum descendantibus, infra dicetur. IV. Ut specialem ob causam, de talibus rebus pacisci, jure civitatis, in quâ quis vivit, voluntario, non sit prohibitum. Talia namque juris voluntarii scita reverenter habenda, magistratuique parendum esse, rectæ rationis est dictamen.



## XVII.

Factum denique, si quod in conventionem deducitur, tale debet esse, ut ejus præstandi facultas sit penes illum, qui factum in se recipit. Huic autem facultati obicem ponit impossibilitas ( utamur sane vocabulo JCtis usitato ) quam faciunt aliam Physicam, & aliam moralem; cui tertiam, quæ meri facti est, quidam superaddunt. Prima factum continere ejusmodi, in quo præstandi facultas simpliciter ac omnino deficit, quodque fieri non permittunt vires naturæ: v. gr. si quis aut cælum digito se velle attingere, aut cum vinolento isto mare Ægæum exhausturum promittat. Talis obligatio delusoria est, nulliusque momenti.

## XVIII.

Similis huic quodammodo est, per interpretationem tamen, & moralem loquendi modum, quæ rem turpem & legibus vetitam continet; nam ut sanctissime JCtorum veterum sublimissimus *Papinianus ait l. 15. ff. de condit. instit. qua facta ledunt pietatem, existimationem, verecundiam nostram, & ( ut generaliter dixerim ) contra bonos mores fiunt, nec facere nos posse credendum est.* Quæ verba, licet de talibus, quæ naturali jure prohibita, ac in se proinde turpia sunt, proprie veniant intelligenda, ad ea tamen etiam, quæ per aliquam legem civitatis in vetitum ire cœperunt, merito sunt extendenda. Quæ enim foro externo & legibus Reip. positivis, interdicuntur, ac ob id delicti habent rationem, quod ab imperium habentibus sint prohibita; foro etiam conscientię interno vetari, per discursum è principio pratico, quod Magistratui parendum esse vult, recta ratio distingat. E quibus, id quod dixi, liquet, pro turpibus & moraliter impossibilibus, quicquid hic in contrarium non nemo differat, habenda videri & illa, quæ lege aliqua societatis civilis positiva, fieri indebita decernuntur.

## XIX.

Circa ea, quæ facto talia sunt, ut fieri non possint, haud uno forte modo fuerit distinguendum. Aut enim conventionis initæ tempore factum erat possibile, aut impossibile. Si prius, tum vel citra culpam promittentis, & ex eventu contigit, ut factum præstari nequeat; & tum, si quidem non mutua fuerit obligatio, præstari deo, quod vires ac summi conatus admittant, si vero mutua fuerit con-

conventio, quod ei ex altera obligatione respondebat, remittendo, liberabitur promissor, adde quæ habet *Grotius l. 3. c. 20. §. 37.* Contra si dolo fecit, quo minus præstari possit, quod est promissum, ad præstandum interesse tenebitur. Posteriore casu, quando nimirum tempore illo, quo conventionem paciscentes ineunt, factum est impossibile, paulo est aliter distinguendum. Aut enim uterque hoc novit; & non tam seridè, quam joco potius agere, neque pacifici sed ludere tantum voluisse, dicendi sunt. Aut alteruter tantummodo sciebat; & hoc casu de dolo solus tenebitur. Ex hisce, quæ jam diximus, cuivis apparer, neque conditionem personarum paciscentium, neque res aut facta in conventionem deducta, pacto huic obstat; quodque consequi hinc est necessum, juri naturæ pactum hoc non adversari.

## XX.

Progredimur ad tertium, ad quod respiciendum *supra §. 7.* diximus; quantum scilicet *domini voluntati in disponenda hereditate suarum, tribuat jus natura?* Per hereditatem hic intelligimus *bonorum universitatem, quam mortis domini jacentem, aut heres occupat, aut illo deficiente, fiscus.* Non opus est autem, ut ad juris Rom. civilis scita, quoad præsens negotium, fiat recursus; quamvis enim per illa, dominis, quoad rerum suarum dispositionem, facultas amplissima, ac illimitatum fere arbitrium permitti videatur; ad ultimam tamen de bonis illis testandi voluntatem, de qua nobis hic sermo proprie non est, hæc solummodo spectare, ipsa legum, quæ pro libertate ista possunt adduci, verba penitus inspecta, statim docebunt: *vide l. 120 ff. de V. S. l. 1. de SS. Eccl.* Sed & legibus postmodum variis valde circumscribi coepit liberior illa testandi (legandi voce utuntur legges XII. Tabb. compositores) non tam libertas, quàm licentia, è jure (sic nonnulli volunt) Solonis Attico primam ducent originem. Quid jus naturæ decernat, nobis incumbit exquirendum. Paucis rem dabimus sic expeditam. Dominii, pleni nimirum, hanc esse vim atque naturam, ut res illo affectu plenissimo alicujus arbitrio subijciantur; ita quidem, ut rebus illis, & ad usum, & ad compendium, non solum uti frui, sed abuti etiam, nisi in quantum ratio aliqua civilis obstat, de iisdem disponere, illasque, prout visum fuerit, alienare quis possit. Et hi quidem sunt actus isti, in quibus tota dominii secundum se spe-

Etati vis cernitur: & quibus, quanta sit domino ejusque voluntati, in rebus suis tribuenda facultas, sit manifestum. Nihil itaque haec-nus impedit, quo minus de rebus dominio suo subiectis, voluntate, non ultima duntaxat, sed quovis alio voluntatis inter vivos actu, dis-ponere quis pro lubitu queat.

## XXI.

Verum quia sæpissime contingit, ut in bonis, quæ pleno etiam domini jure ad nos spectant, (de fræno illo, quod publica civitatis salus, privatorum circa res suas libertati nonnunquam injicit, nihil dicam) jus aliquod quæsitum alter habeat, quod illi auferri citra injuriam non possit; sequitur exinde, libertatem domino, in re sua, quoad actus jam dictos, aliàs competentem, hoc ipso valde restringi. Illud vero jus, quod in alterius bonis alter habet nonnunquam quæ-situm, vel ex pacto resultat, vel lege est aliqua constitutum. De pri-ore præcedens monuit dissertatio; Posterius vel ipsa naturæ lex, vel voluntaria aliqua, in bonis alterius constituit. Sic ipso naturæ jure, parentum bona liberis ex se procreatis debentur, & in bonis illis jus aliquod, jam cum vivis adhuc parentibus, habent quæsitum, v. vo quo-que patre, domini quodammodo existimantur. uti §. 2. *Inst. de hered. qual. & diff.* loquitur Justinianus Imperator: quæ verba licet de suis tantum heredibus, quos *αυτοκληρονόμους* Græci vocant, ibidem di-cantur, de liberis tamen omnibus, re intra juris naturalis terminos considerata, commode possunt intelligi. Juris istius quæsitum intuitu parentum hereditas debita successio, & quidem, ut *in notis* addit *Gothesfredus*, jure naturæ debita, dicitur à Paulo I. C. l. 7. ff. de bon. damnat. adde *Interpp. ad e. a. §. 2. Inst. de her. qual.* nobis enim non licet hic esse prolixioribus, ceu fas est illis, qui prænobile hoc, de ju-re liberorum, in bona parentum, lege naturali quæsito, ex dignitate tractare satagunt argumentum.

## XXII.

Porro quia liberi parentum sunt alii naturæ, per procreatio-nem scilicet; alii facti, s. lege aliquâ, naturam imitante, nimirum per adoptionem: natum exinde liberorum in naturales ac ad ipsos dis-crimen. Procreatio illa vel fit legitime, & secundum præcepta legum, vel illegitime: hinc liberi naturales alii sunt legitimi, qui-dam illegitimi, qui pro diversis criminum gradibus, per species ad  
invi-

in vicem varias distinguuntur. De naturalibus legitime natis quin  
*præced. §. dicta* veniant intelligenda, in dubii periculum nemo te-  
 mere vocabit; cum quibus pari, quod successione legitima quid-  
 em attinet, jure censentur illi, qui per adoptionem nostri sunt facti,  
 sive intra solius naturalis juris potestatem te contineas, sive illius, quod  
 Romanorum civile est, fines ingrediaris, §. 2. *Inst. de adopt. §. 14. de  
 hered. que ab intest. def.* De illegitimis aliquod superesse dubium  
 poterat videri, propter civiles quam plurimum populorum leges, quib-  
 us à successione, in parentum bona, tales omnino repelluntur, & quas  
 observari, ius ipsum naturale præcipit. Sed nobis hic de Jure naturæ  
 sermo est, per quod, cessante lege civili, nullum, quoad hanc in bo-  
 na successione, inter legitimos, & illegitime natos, discrimen ag-  
 nosco. Quod si vitium illud natiuitate contractum, Majestatis in-  
 dulgentia [quod fit per legitimatorem quovis modo factam] pur-  
 gari contingat, quo minus, ipso etiam jure civili, parentibus suis  
 succedant, nihil obstat.

### XXIII.

Quærere hic non inepte quis posset, 1. An post initum cum a-  
 liquo confraternitatis pactum, in filium liceat adoptare extraneum?  
 quod si quidem bona quis allodialia tantum possideat, negandum om-  
 ninò putarim, propterea quod talis adoptio non possit non hoc  
 casu fieri in fraudem confratris, ac alienationis habeat effectum, quæ  
 uti *differt. I.* ostensum, confratribus permilla non est. Quod si bo-  
 na fuerint feudalia, quem possit effectum talis adoptio sortiri, non  
 video, cum *filius adoptivus in feudum non succedat, Feud. 2. tit. 26. §.  
 adoptivus*, nisi ea lege facta sit per Principem arrogatio, ut adoptivus  
 succedat, aut cum arrogatione vel adoptione, jura naturalia con-  
 currant; qui duo casus huc non spectant. Quod si aut pacto cau-  
 tum, aut statuto vel consuetudine sit alicubi introductum, ut & ado-  
 ptivi succedant, quod fieri posse, *ad hunc §. notant Baldus alijq. Dd.*  
 adoptantem hoc casu nihil agere, neque cum pacto confraternita-  
 tis hanc posse consistere adoptionem, certum est. II. An confrater-  
 nitas intercedat, quo minus locum inveniat legitimatio, facta hoc  
 fine, ut in bonis feudalibus (nam de allodialibus tanta non est diffi-  
 cultas) confraternitate nexis, filius naturalis succedat? Tres fuisse  
 præcipuos olim, apud Romanos, legitimatorem modos, est notis-

finum, quarum quæ per oblationem Curiz fiebat, pridem jam exo-  
 levit. Dux quæ sunt reliquæ, hodiernis adhuc temporibus usu fre-  
 quentantur. Si quis igitur, ex muliere, cujus matrimonium mini-  
 me legibus interdictum fuerat, filium naturalem susceperit, dubium  
 suboritur; an aut per subsequens matrimonium, patris voluntate le-  
 gitimari, aut ad legitimandum, hoc pacto, ut in bonis succedat, Prin-  
 cipi possit à patre offerri? quod utrumque censeo affirmandum. Et  
 quidem circa legitimationem illam, quæ fit per subsequens matrimo-  
 nium, magis expedita res videtur, cum tali modo legitimatis, & civi-  
 li & canonico jure, quod legibus feudalibus correctum non est, ead-  
 em cum legitimis succedendi jura competant *l. 10. C. de nat. lib. c.*  
*6. qui fil. sint legis.* ac talem legitimationem, quam conjugalem dixit  
*Gail. 2. Observ. 141. n. 1.* jus naturæ ipsum quam maxime dici possit  
 approbare. Plus difficultatis habere poterat videri, legitimatio Prin-  
 cipalis, cum per illam facti legitimi, in feudis non succedant, quæ  
 communis est fere Dd. sententia, *ad Feud. 2. tit. 26. §. naturales.* cœ-  
 terum & hoc modo legitimatos in feudis succedere, dummodo diser-  
 tis id ipsum verbis, & nominatim rescripto contineatur, recte tradunt  
*Gothofr. ad d. §. naturales. Mynsing. §. Observ. 42. & Gail. 2. Observ.*  
*142. n. 12.* Quod non tantum de feudis novis, in quibus & alias ni-  
 hil agnatis debetur. *Feud. 1. tit. 14. in fin.* sed antiquis etiam venit in-  
 telligendum. Cum itaque per utramque legitimationem, tam prin-  
 cipalem etiam, quam conjugalem, jus legitimorum liberorum legi-  
 timati consequantur, per quod non agnatis modo omnibus præfe-  
 runtur, sed cum ipsis etiam fratribus germanis legitime natis, pari,  
 quod ajunt, passim incedunt, sequitur, his etiam, qui sunt ex pacto con-  
 fratres, merito illos anteferri. Verum de liberis plus satis est jam  
 dictum.

#### XXIV.

Unicum restat notandum, à lege naturali, quæ liberos ad paren-  
 tum bona vocari, supra diximus, & per quam jus illis aliquod, quod  
 perfectum dicere hætenus liceat, in bonis parentum constituitur, non  
 removendam paternæ voluntatis conjecturam, quæ, uti *Grotius de*  
*I. B. l. 2. c. 7. n. 5.* ait, *parentes creduntur id velle, ut liberis quam opti-*  
*me prospectum sit.* Ut adeo jus hoc præsumpta parentum voluntate  
 niti, etiam recte sane dicatur.



Eadem, quoad disponenda bona, voluntatis domini ratio est, si jure societatis alicujus legitimo constitutum sit, ut de bonis vel non liceat ullo modo disponere, vel non nisi de partis per industriam; sed ut proximioribus, intra certos necessitudinis gradus constitutis, ex lege civitatis, bona obveniant; qualem ante Solonis tempora legem fuisse Athenis, scribunt nonnulli. Hoc enim casu, quin jus aliquod, in bonis alterius, ex lege civili, quam servandam ratio naturalis, ut supra quoque monui, dicat, constitutum habeant proximiores isti, dubium non est. Huc usque disertata declarant evidenter, domino- rum voluntatem, circa bonorum suorum dispositionem, multum restringi, quando lege aliqua, sive naturali, sive voluntaria, jus aliquod succedendi certum, quodque ad juris perfecti vim quam proxime accedat, viventibus adhuc dominis, est aliis constitutum. Extra hos vero casus, vi ac natura domini, jus suum dominis, in alium quovis modo transferre res suas volentibus, manere saluum.

## XXVI.

Sunt, qui & eo casu, quo hereditas, seu bona, lege deferuntur, à domini voluntate, saltem probabili ac præsumpta, successionem ab intestato, naturalem habere originem dicunt; *vide Grot. l. 2. c. 7. §. 3. & ad eum in Comment. doctiss. Boclerum.* Verum hic observandum; duplici modo per legem deferri hereditatem; I. Ut certis illam personis, in casum mortis domini, lex adjudicet, liberrima nihilominus de bonis illis aliter disponendi facultate domino relicta. II. Ut omnem, quæ in contrarium est, mentis testationem super bonis illis domino interdicat: quod ipsum quando fit, an non ad scopum potius civitatis totius, quam præsumptam illam privatorum voluntatem respiciat legislator civilis, minimum possis haud præter rem dubitare. Testantur idem varia diversarum gentium instituta, nec ulla re magis fere, quam legibus, quæ de successionibus legitimis, ubi liberi deficiunt, videas dissidere gentes. In hæc, soli agnati, exclusis cognatis, etiam gradu proximioribus, ad bona admittuntur; alibi, jure æquali, omnes, ejusdem gradus qui sunt, in portiones æquas succedunt. Est, ubi fratrum filii jure substitutionis in locum patris sui, cum patris admittuntur; est ubi representationi locus non est. Et quis discrepantes hos in gentibus usitatos successionum modos orati-

oratione brevi complectatur? Qui non poterant tamen nisi uno se-  
re modo habere; si ad conjecturam voluntatis, quæ constans hic esse  
creditur, ut aut gradu proximioribus & carissimis, bona obveniant;  
aut, unde venerunt, eò revertantur, semper fieret in hoc negotio re-  
spectus.

## XXVII.

Paucis adhuc notari meretur, cum res aliæ dicantur singulæ,  
quædam vero universæ; quoad actus alienativos, nullam, si jus na-  
turæ respicias, inter res illas esse differentiam; cum eadem cadat in  
utrasque affectio, neque minus sint in commercio res universæ, quam  
singulæ. Eadem quoque dominii secundum se spectati est natura, quæ  
bonorum universitatem, & quæ res singulas tenemus; neque vim  
suam magis in his, quam in illis exferit. Adde, quod effectus domi-  
nii, qui sunt, liberrime de rebus disponere, res illas alienare, & amis-  
sas vindicare, non à rebus eidem subjectis, illarumque aut paucitate  
aut multitudine, sed ipsa dominii ipso ac natura veniant æstimandi.  
Sed quo dilabor?

## XXVIII.

Ex hæcenus dictis constare crediderim, juri naturæ non refragari  
pactum confraternitatis, si ve juris istius indagandi aut probandi  
rationem principaliorem, si ve pactum in se, si ve facultatem dominis,  
res suas, tam universas, quam singulas, in alium transferre volentibus,  
hoc eodem jure concessam species. Reliquum nunc est, ut de perso-  
nis, tam quæ pactum hoc ineunt, quam quarum poterat aliquo mo-  
do videri interesse, quo magis minusve pactum ineatur, paucis, ut  
recepimus, agatur. Quæ personæ possint hoc modo pacisci, præ-  
cedens dissertatio prolixius exposuit, quæ ne repeti hic vitiose quis  
existimet, aliam nunc insitemus viam; quid circa personas illustres,  
superiorem non recognoscentes, quoad jus naturæ præterea veniat  
observandum, operam daturi, ut perquiramus. Ad rerum publ. quæ  
regimen unius præferunt, Rectores, tota controversia referetur; fie-  
ri quippe longè potest facilius, ut cum exteræ gentis Principe, tale  
foedus hi pangant, quam qui polyarchicis Rebus publ. præstant; in  
quibus τῶν κοινῶν familia, ( uno casu, de quo inferius, excepto )  
evenire vix potest, ut omnis emoriatur.

## XXIX.

Regum non unam esse conditionem, pervulgatum est adde, ut nec illos amplius lateat, qui ultra primos doctrinæ civilis ductus, haud quicquam sapiunt præclari. Duo hic consideranda jura multum inter se diversa; primum in ipso regiminis actu vertitur, & spectat actus in Republ. gerendos. Alterum magis refertur ad regnum, materialiter (ut sic loqui liceat) consideratum, & in dispositione bonorum acrerum, ad regnum pertinentium cernitur, inque dominii effectibus vim suam exserit. Jus imperii, resque summam reipubl. attinentes administrandi facultatem spectant illa, quæ & *Aristot.* 3. *Pol.* c. 10. & *M. Cicero*, alique, de regnorum differentiis tradunt. Sed illa nihil ad præsens faciunt negotium. Quæ de modis habendi, *Grotius*, de *I.B.L.* l. 1. c. 3. n. 11. apto magis, ut intelligi voluit, significatu, quam loquendi modo, tradit, ad rem propius pertinent. Ut formulas captem, quando de negotio constat, difficulter equidem me parior adduci; aliis enim, jus, quod in re homines habent, à modo habendi diversum, quid esse, & quid alterum altero intersit, minime ignorasse nostrum, procul à dubii periculo pono. Philosophiæ huic Grotianæ qui pressius inhærent, triplex Regum cognoscere discrimen cogentur: quidam pleno proprietatis, alii usufructuario, nonnulli temporario jure regnabunt. Posterioris an omnino detur, aut dari aliquod possit exemplum, haud abs te dubitaveris, neque quod de *Dilatatore Grotius* assert, tale quidem est, ut rigorosius sustineat examen. Adde quæ in *Comment. ad Grot.* hic doctissime disserit *Bocclerus*, Rectius igitur huic substituisset *Διουμένην*. Cæterum cum Reges ejusmodi temporales, h.e. vel ad certum aliquod tempus, vel negotii alicujus expediendi causa constitutos, hodie non agnoscat Europa, frustra de illis hic verba fiunt.

## XXX.

Nobis, utut omnia hæc Grotiana suis haud carere dubiis videantur, in duplici nihilominus ordine Reges collocabuntur; quorum alii pleno proprietatis (ut formulas Grotianas retineamus) alii usufructuario duntaxat jure regna possident. Ab hisce, qui proximum à temporariis, si qui sunt, locum tenent, auspiciu ducemus. Usufructuarii dicuntur Reges, qui regnum, quod aut populi est, aut qui sunt in illo Populo, Procerum, sive plenum illud suerit, sive pleno mi-

mus, ex illorum, quorum proprietat est, voluntate, minus plene, *sen-  
citra jus alienandi, possidens.* Usufructuarius nomen exinde te-  
nent, quod insignis intercedat ejusmodi Regibus cum usufructuario  
affinitas, de qua dictum memini, sed paucis, adversus *Auberium Ad-  
vocatum Parisiensem pars. 1. c. 6. §. 5.* Uterque jus aliquod in re alie-  
na habet, & pares hactenus videntur; sed in eo dissimilis est condi-  
tio; quod usufructuarii privati jus cum vita expiret, neque ad prolem  
quicquam transmittatur; Regum verò jus usufructuarium modo  
personale fit, & cum vita simul intercidat; modo familiz cohereat,  
quâ vel quoad mares solos, vel quoad omnes, tam foeminas, illarum-  
que descendentes etiam, quam quoad mares, prorsus extincta, jus  
illud utile (sic vocabimus) ad Proceres aut populum demum rever-  
tatur. Exemplis, si liceret evagari, res fieret clarissima. Illud non  
de nihilo quibusdam in dubium vocatur, quod *c. a. c. n. 11. Grotius*  
ait, Reges, tam qui primi eliguntur, quam qui electis legitimo ordi-  
ne succedunt, jure duntaxat usufructuario regnum possidere. Enim-  
vero, quemadmodum neque successio neque electio in se spectata ti-  
tuli sunt imperii, qui certam imperio formam assignent, aut quic-  
quam per se demant vel addant illimitatâ potestatis regnantibus; ita  
jus usufructuarium neutri, ut necessarium accidens aliquod semper  
est conjunctum. Omnia dependent à voluntate conferentium ex-  
pressa, & à formula, quâ traditur imperium illi, qui primus eligitur  
in ejus, uti locum, ita jura quoque, nâ aliter convenerit, posteri suc-  
cedunt.

### XXXI.

Usufructuariis hisce, de quibus diximus, aliud opponit Regum  
genus, Grotius noster, qui pleno proprietatis jure habent imperium,  
seu, quod eodem recidit, regnum habent in patrimonio. Tales ex-  
mente quidem illius sunt, *qui bello victores imperium quasiverunt, aut  
in quorum ditionem populus aliquis, mali majoris vitandi causa, ita  
se se dedit, ut nihil exciperetur.* Noti sunt effectus bellorum; in  
quibus principatum facile tenet dominii acquisitio, unde & occupa-  
tio per bellum, inter modos acquirendi naturales refertur à Jctis Ro-  
manis, cum quibus & ipse facere videtur *Aristoteles 1. Pol. c. 5.* si qui-  
dem verosimile est, quod interpretum nonnullis placet, *ἀρχείας*  
*ποῦς* tam late accipi Philosopho, ut & bellum includat, eo quod  
bello

bello non sint uss aliter Græci, ad capiendos barbaros, quam plagis suis ad occupandas feras, utitur venator. Circa hanc imperii per bellum acquisitionem, notari diligenter meretur; nec semper, nec indistincte Regi, sed modo huic, modo ipsi populo, per bellum acquiri, prout vel Regis, vel populi auspiciis ac sumptibus, bellum fuit gestum.

### XXXII.

Alter modus, quo spontis suæ impulsu alteri se regendum sine exceptione populus aliquis permittit, nihil habet difficultatis apud illos, qui libertatem, publicam quoque illam, ac integri alicujus populi, libere alienari, in alium, vel unum, vel uno plures, transferri posse, veritatis convicti viribus habent persuasum. Illud scrupulum injicit, qui fieri possit, ut quædam imperia non summa, plene nihilominus habeantur: & fatendum sane, laqueos sibi ipsi tendere videri *Grotium*, quando pleno proprietatis jure, regna habere dicit illos, qui aut jure belli, aut sine exceptione, per consensum populi, imperium tenent. Hos vero utrosque summum in suis imperium habere, nemo temere erit, qui eat inficias. In victos imperium ex arbitrio victoris, qui leges dat, non accipit, dependet: in illos, qui sine exceptione, alterius se imperio permiserunt, quin absolutum jus competit imperanti, dubium esse non potest.

### XXXIII.

Haecenus dicta si solide intelligantur, ed proficiunt, ut controversis ac quæstionibus illis, quæ de adhibendo procerum aut populi consensu, quem in hisce confraternitatis pactis non omittendum, nimis indistincte, & illimitate censet *Guttich. lib. 7. lit. c.* tum præterea, an & quibus Principibus liceat hoc modo pacisci, solent aliàs agitari, rectius dijudicandis viam præmuniant. Omissis igitur illis, quos jure temporario regnantes facit *H. Grotius*, de his, qui pleno domini jure regna tenent, primo loco dicemus. Hi vero, quo minus hoc confraternitatis pactum, non requisito Procerum aut populi consensu, cum aliis ineant, nihil esse videtur hæcenus obstaculo. Neque, de illo ut dubitemus, domini natura & conditio permittit. Sed & de regnis testati nonnunquam tales leguntur. Nota sunt Attali Pergameni, Nicomedis Bithynici, & Appionis Cyrenaici, & veteris historiæ monumentis exempla, qualibus nec omnino recentiora tem-



crediderim destitui. Si itaque permiffum est illis alienare, quin hoc etiam modo de regnis constituent, quis impedit? Nec enim dubito, nimis indistincte pronunciasse *Lucam de Penna in l. quicumque col. 3. C. de Agric. & cens. Principem habere se erga bona & jura regni, sicut maritus erga dotem uxoris*. Quæ Philosophia, licet fori crepituaculis, & præsertim Gallicanis mire arrideat, minus tamen est ad palatum doctioribus civilis prudentiæ Consultis.

#### XXXIV.

Tales verò Reges an hodierno tempore veneretur Europa, inquirere, invisum fuerit problema; nec facile serunt Reges Principesque, ut de jure suo, & quantum sibi liceat, privati disceptent. Galli, quanquam de illimitata Regis sui potestate mire paratrageodiantur, domesticæque servitutis carmina peregrinis occulant, hanc tamen è coronæ bonis quicquam alienandi facultatem Principi non concedunt, de quo vide ineptientem *Auberium des Justes pretens. l. 2. c. 3.* Ex quibus apparet, summum quidem in suos Imperium, sed non plene, ut *Grotius* loquitur, habere Regem Francorum. An sub Carolinis quoque res sic habuerit, dubitari non inepte posset, præsertim cum & Carolus M. & Ludovicus Pius, de regnis testati scribantur, nisi cum *Grotio* velis excipere, *testationem hanc commendationis magis vim, apud populum habuisse, quam vera alienationis*. Adde quæ nos *contra eund. Auber. part. 1. c. 3. §. 5.* annotamus. Hoc interim certum est, qui regnum habent in patrimonio, Regibus illud alienandi jus posse nequaquam denegari: nam quod de temperamento illo, quo subditorum consensum nihilominus adhiberi melius sit, nonnulli dicunt, consilium magis est quam præcepti, neque huc vere pertinet.

#### XXXV.

Alitèr longe fuerit pronunciandum, si de usufructuariis sermo sit: hi enim, quia nihil verè suum possident, quod ususfructus docet conditio, nihil ex bonis illis alienare, neque de alienis disponere, citra Procerum aut populi consensum possunt. Et illos quidem, quorum personalis tantummodo est electio, & quorum jus omne cum vita simul expirat, ut nec descendentiis, nedum agnatis, quicquam debeatur, quia post mortem demum effectum pactio habet, ab eadem proorsus excludi constat. Quando autem certæ familiæ regnum jure usufructuario traditum est, si Procerum aut populi consensus accedat, pactio-

paſſioni locum fieri poſſe, dubitandum non eſt. Et tum ſi caſum conventionem expreſſum evenire contingat, populo ipſi, non quæ in populo illo imperium tenet, familiæ Regiæ regnum acquiritur. Sed quia ſane rarius evenit, ut Reges tale confraternitatis inter ſe pactum ineant; nobis hic etiam tanto licebit eſſe brevioribus.

#### XXXVI.

Notandum porro circa Reges illos eſt, triplex bonorum genus, in regnis præſertim ulufructuariis inveniri; quædam bona Coronæ immobilia dicuntur, quæ ſunt Principis, quæ talis, & publica, nec aliter tamen ad Principem pertinent, quam qd. ille corporis iſtius moralis, quod civitatem dicimus, caput repræſentat. Alia Regis conſtituunt Domanium, ſuntque fiſcalia illa jura ac prædia, Principi à populo aut Proceribus assignata, è quorum proventibus annuis, quos ſuos facit, dignitatem ſuam melius Princeps tueatur; *vide Horem. Francog. c. 9. Choppin. de Domanio Limn. N. R. F. l. 2. c. 8. Beſold. de Regal. c. 9. §. 1. Auber. l. 1. c. 3.* Quædam denique ſunt res Principum patrimoniales, quas neque intuitu regni, neque à regno poſſident, ſed, vel ante adeptam dignitatem regiam, jam tum tenebant; vel poſtea legitime acquiſiverunt. Priora duo bonorum genera Rex ulufructuarius neque alienare, neque de illis diſponere poteſt; quoad poſteriora res ſecus habet, quicquid in contrarium ineptiſſime molitur *Auberius deſ. juſt. præſens. l. 1. c. 2.* qui bona hæc, per aditionem regni, cum bonis coronæ confundi, frigidis aliquot uſus ſimilibus, contendit.

#### XXXVII.

De imperantibus in ſtatu unius actum hæcenus eſt. Diximus ſuprà, uno fieri caſu poſſe, ut, qui Rempubl. polyarchicam habent in manu, cum finitimo populo, aut qui in illo jus imperii habet, pactum confraternitatis inire poſſint, nimirum ſi in Ariſtocratico aut Oligarchico ſtatu, penes unius familiæ paucos homines alienabiliter ſit imperium. Hic enim, quia contingere poteſt, ut iſta familia, quæ Remp. hoc modo poſſidet, aliquando emoriatur, nihil obſtat, quo minus pactum hoc poſſit aliquem habere effectum. Talis Oligarchiæ, verus Corinthiorum reſpublica nobis exhibet exemplum, quæ regio Sifyphi ſtemmate extincto, cum ſub Herculis poſteris, qui à Bacchide, Prumnidis filio, Bachiadæ dicebantur, more regio fuiſ-

set administrata, tandem post interitum Tolestis, regimen unius forma Oligarchica commutavit, ita ut penes istos Bacchiadas esset imperium, iique ex suo ordine præsidēs Reipubl. qui Prytanes audiebant, ad usque Cypselidarum tyrannidem daret, uti ex *Herodoto & Pausania* tradit *Ubbo Emmius in descripsi. Reipubl. Corinthiaca.*

### XXXVIII.

Sequuntur porro personæ, quarum potest interesse, quo magis minusve pactum tale fiat. Has vero duplicis ordinis deprehendo: quarundam, juris in re quæstui ratione, interest; sunt alie, quarum res agitur, ob aliquod inde olim proveniendum vel commodum vel incommodum. Illi sunt necessitudine quadam conjuncti, quæ cum sit alia sanguinis, & alia matrimonii, illarum præsentis est negotii. Quæ sanguinis dicitur, vel descendentium est, vel à latere venientium. Illorum prima est causa, licet quoad sexum nonnulli differantiam, jus, quod est singulorum populorum, constituat. Est, ubi pari cum masculis jure, quoad successiones legitimas, censeantur scæminæ; est, ubi à successione in res immobiles prorsus excluduntur. Nonnulli ad res illas immobiles, non nisi masculis deficientibus, solæ admittuntur, quæ Græcis dicuntur *ἐπίκλητοι*. alicubi denique illis exclusis præferuntur agnati. Quæ quidem à lege civili esse omnia, vix dubitaverit eruditus; re in nudis naturæ juris terminis spectata, aliud obtinet. Sed & illud fuerit observandum; cum successione hominum privatorum aliter multo rem esse comparatam, deque illis aliud statuendum, quam si de Regū & Principū successione, quæstio ageretur; de quo negotio late disserere instituti fines excedit. De jure liberorum superius actum; tantum de scæminis hic ut breviter dicamus, restat.

### XXXIX.

Duplicem regnorum (sive successiva illa fuerint, sive hereditaria) successionem dari, alteram agnaticam, cognaticam alteram, testantur historiæ, tam Veteres, quam recentiores. Primum successione, quam *linealem agnaticam*, & *juris Francici* vocat *Grotius de I. B. l. 2. c. 8. n. 23.* genus, in florentissimo Francorum regno servatur, quam lege Salica primitus introductam, Franci gloriantur; de cujus averti

verita.

veritate tamen haud de nihilo liceat dubitare, quam sibi persuaderi  
 ægerrime passa est Johanna Ludovici Hutini filia, quæ patruo Philip-  
 po item de regno movit, nec ipsis illud negantibus Francogallis.  
 Cognatica se dupliciter habet; autem foeminas admittit, exstan-  
 tibus adhuc aliis ejusdem stirpis agnatis, ita ut filia primogeniti præ-  
 feratur patruo: aut non nisi in deficientium agnatorum casum foe-  
 minis addicit successionem. Talis cognatica successio quondam  
 fuit apud Aragonios, quæ proximioribus aliis masculis non existen-  
 tibus, teste *Mariana*, patrum filia Regis præferebat. Ex quibus,  
 ut hoc obiter adjiciam, apparet, frustraneum jus aliquod in Arago-  
 niam, Gallos Andegaveses, ob Jolantam Petri IV. filiam, Ludovico  
 Ludovici Andegavensis filio nuptam, prætendisse. In regnis, ubi a-  
 gnaticæ successioni tantummodo locus relinquatur, cum foeminis  
 nihil debeatur, neque jus aliquod in regni bonis habeant quæsitum,  
 quominus ejusmodi confraternitates, in familia quoad mares extin-  
 ctæ casum, libere ineanantur, nihil est impedimento. Secus vero res ha-  
 bet, si foeminas etiam certis casibus ad regni successionem leges ad-  
 mittant; tunc enim pacta hæc successoria, nisi familia quoad omnes,  
 etiam foeminas, emortua, non valebunt. Quæ foeminarum circa  
 successiones, in rebus publ. pro differente illarum conditione, debeat  
 esse ratio, multis edisserere præsentis non est instituti. Sufficiat hic in-  
 dice quasi digito ostendisse, non naturalem aliquam, sed civilem tan-  
 tum rationem velle, ut quoad successiones illas, in bona præsertim  
 immobilia, deterioris alicubi sit conditionis sequior sexus; de quo  
 argumento prolixius, dissertatione posteriore tractabitur.

## XL.

Illæ autem, quam modo diximus, ratio civilis, cum neque jura  
 cognationis naturalis tollere, neque, quin liberorum censu filia ve-  
 niant, efficere vere possit; hinc foeminis supersticibus certa quædam  
 portio in pecunia numerata, aliisque bonis mobilibus ut plurimum  
 consistens, relinquenda est, ex qua dignitatem tueri, & pro persona-  
 rum conditione, digne possint elocari. Cujus quantitatem nisi par-  
 tium consensu expresso statutam, pacti succesorii formula contineat,  
 personæ dignitas ac conditio facile definiet. Hanc summam ex pacto  
 succedentes exolvere tenentur; est enim hæc universitatis bonorum  
 natus;

natura, ut & commoda & incommoda habeat conjuncta, facit *lex l. ff. de bon. poss.* Accedit præterea, quod res cum suo onere transeat, neque plus juris præterdere successores in ejusmodi bonis possunt, quam defuncti possessores habuerunt, qui ad dotem hanc, foeminis pro personarum ac generis conditione dandam, non civili duntaxat, sed naturali etiam jure fuerunt obstricti. Quid fieri igitur potest, ut ab onere isthoc sint eximii successores?

## XLI.

A foeminis priusquam abeamus, verbo videtur adhuc monendum, quod de feudo foeminino, h. e. à foemina primum acquisito (ilud enim proprie foemineum dici notum est) deque bonis allodialibus, quorum & superstites foeminae sunt capaces, an nimirum *pacta hæc successoria, de illis etiam, in præjudicium ipsarum foeminarum fieri possint?* nonnulli movent, tantæ non esse difficultatis, quin ex illis, quæ de jure, in alterius bonis alteri quæsito, supra dixi, facili negotio possint expediri. Nec opus est, ut cum *Bessio de pact. c. 4. p. 84.* inter feuda foeminea à foeminis descendentia, & feuda à masculis quidem acquisita, ita tamen ut etiam foeminae sint illorum participes, distinguamus. Non attento hoc foeminarum præjudicio, pacta fraternitatis de feudis ejusmodi fieri posse, modo foeminae paciscentium existant heredes, accipiendo nimirum *certam pecunia summam, ipsis in pacto destinatam, quæ hoc in casu vicem legitimæ præsentare videatur*, verius sibi videri dicit *Gutrieb. ib. §. lit. b.* cui sententiæ quo minus accedam, inter alias, quas adducere liceret, rationes, hæc cum primis obstat, quod quoad jus illud quæsitum, nemini sine facto suo auferendum, discrimen inter mares & foeminas nullum omnino ponat Jus Naturæ. Neque magis huc spectat, quod de legitima relicta assertit idem; quamvis enim ipso naturæ jure liberis hæc adeo debeatur, ut quoad alimenta necessaria legibus humanis tolli nequaquam possit, *Grot. de l. b. l. 2. c. 7. §. 4.* exinde tamen non conficitur, hæc relicta, de cæteris bonis polle pro lubitu disponi. Nam quod de querela inofficiosi per legitimam sublata Jctis scribitur, dubium non est, quin civilis Romanorum juris sapiat rigorem. Non igitur rarius solum est, & æquitati magis consentaneum, ut idem *Gutrieb.* loquitur, *sic etiam ad investiturae hujus mutationem, foeminarum*



*rum quoque tempore in ea conventionis existentium, consensus requiratur; sed omnino necessarium, & nequaquam prætermittendum.*

#### XLII.

Proximum post descendentes (de ascendentibus enim, illorumque successione, non opus est, ut hic agamus) locum occupant à latere venientes; quos in agnatos & cognatos distingui, pervulgatum est. Horum utrorumque successio, licet eodem fere, quo descendentium, fundamento, probabili scil. voluntatis defuncti conjectura, nitatur, minus attamen expedita est, sive dictam modo voluntatis, quondam domini, conjecturam, sive discrepantes hac in parte civiles singulorum populorum leges attendas. Etenim verissimum est, quod dicit *Grotius de I. B. l. 2. c. 7 §. 9. ubi desunt liberi, quibus naturaliter deferatur successio, minus esse rem expeditam, nec ulla in parte magis variare leges.* In nonnullis civitatibus, pari cum agnatis jure, salvo tamen proximior gradu, censentur cognati: nonnulli jus successionis ab intestato nullum competit cognatis, sed soli, post descendentes, agnati admittuntur. Sic olim in Republ. Romana ex lege XII. Tabb. decemvirali, exclusi cognatis, soli succedebant agnati; quo ipso familiarum propagationi ac dignitati fuit haud dubie consultum. Unde hauserint Romani, non latet eruditos; simile quid alibi quoque fuit observatum. Ne nunc dicam, quod ad remotiores alicubi gradus hæc successio extendatur.

#### XLIII.

Ista vero, quæ in legibus singulorum populorum, quoad successionem hanc, à latere venientium, reperitur varietas, ex duobus præcipue fontibus videtur emanasse. Primum facio, minus evidentem, circa collateralium successionem, defuncti voluntatis conjecturam; quæ quemadmodum quoad descendentes, naturali magis ratione, propter naturæ quam maxime congruentem parentum in liberos benivolentiam, perpetuo certa est; ita si de propinquis, & necessitudine attinentibus aliis, incidat quæstio, non pauca occurrunt, quæ præsumptam hanc voluntatis conjecturam haud leviter interdum convellant. Sunt amici, sunt, qui beneficiis quam plurimis nos reddiderunt suos, quosque magis proinde quam propinquos istos, parum de nobis ut plurimum sollicitos, amamus, ne dicam, amare fas est. Hic si præsumptæ, sed morte interceptæ defunctorum

voluntates aliquod habere momentum deberent, potius illis, quam his, hereditates essent addicendæ. Et hæc quidem, ut opinor, difficilis voluntatum, quoad collaterales præsertim, conjectura, liberio-rem illam, non legendi modo, sed de bonis omnibus testandi licen-  
tiam in civitates nonnullas introduxisse primitus videtur.

#### XLIV.

Alter legum circa collateralium successionem variantium fons, est diversus ille diversarum rerumpub. genius, qui non permittit, ut, capiendarum ab intestato hereditatum, similis sit in quavis civitate ratio. Atqui hinc fieri videmus, ut in nonnullis quidem Rebuspubl. masculi, & ex illis descendentes, foeminis illarumque progenie potiora ferant; alibi nullo sexus attento discrimine, pari omnes ordine habeantur; de quo pluribus hic disserere, proximæ dissertatio-  
nis argumentum foret occupare. Cæteroquin de legitimæ collatera-  
lium successionis fundamento plura qui desiderat, *Grotium c. a. l.* adeat, quem erudita profecto in hoc argumento industria fuisse ver-  
satum, nemo, nisi aut indoctus, aut improbus, difficebitur.

#### XLV.

Ad negotium nunc erunt dicta hætenus applicanda. Quoniam igitur, si quid, circa successiones illas collateralium legitimas, lege ali-  
quâ civili cautum fuerit, id observari, jus naturæ dicitur; exinde sane  
apparet, si quando jus aliquod in spe succedendi certa fundatum ha-  
bent à latere venientes, illorum consensum, in constituendo confrat-  
ternitatis pacto, non utilem duntaxat, ad lites forte præcavendas,  
esse, sed omnino etiam ac necessariò requiri. Neque aliter hæte-  
nus judicarunt gentes Europæ, in quibus domicilium juri confrat-  
ternitatis est permittum. Suadet idem ratio naturalis, quæ jubet ita  
pacisci, ne pactum alterius alteri præjudicet, neve iniqua conditio,  
citra meritum præcedens, inferatur. Præcipit porro civilis utilitas, in  
quiete & tranquillitate, non in tumultibus ac bellis, societatis civi-  
lis vinculum dissolventibus, omnesque roboris ac virium Reipubl.  
nervos incidentibus, collocata. Iple denique præcipuus pacti success-  
forii scopus, successio videlicet, in demortuæ familiæ bona, id exigere  
quodam modo possit videri, ut illorum, quorum interest quovis mo-  
do, consensus adhibeatur. Quia enim pleræque Principum familiæ  
pluribus inter se lineis sunt discretæ, facile poterit contingere, ut  
paci-

pacifcens linea, quoad masculos, emoriatur: quo casu si ad istius  
familix lineam alteram, pacto non inclusam, ut fieri fas est, successio,  
non obstante pacto hoc, devolvatur, omnis pacti vis corruet; quippe  
cui succedens illa agnatorum linea non consensit, nec ad illud ser-  
vandum proinde est obligata. Secus verò quin res habeat, quoad  
consensum illum, si aut pacto, aut moribus, aut legibus civitatis, aut  
ob feudum noviter quæsitum *l. 1. Feud. tit. 1. §. 2. & tit. 14. in fin.* ni-  
hil agnatis debeat, dubium esse non potest.

#### XLVI.

Ordo nos jam vocat ad illas personas, quarum rem agi supra di-  
ximus, ab aliquod inde proventurum, vel commodum, vel incom-  
modum. Subditos intelligo, quorum ut interest, ne aut in certæ spei,  
aut ignotis dominis relinquuntur; ita, ne cuivis Principi aut Domino  
subjiciantur, vel cum primis interesse certum est. Multis poterat hic  
de differente subditorum conditione, pro diverso Reipubl. statu, de  
imperio quorundam Principum despotico, morum, legum ac religio-  
nis diversitate, unde non minimum subditis incommodum socius  
enascitur, disseri; denique an Reges & Principes, quibus parentium  
salus ac commodum suprema lex esse debet, cum diversæ religionis  
Principibus, & tyrannico in suos imperio grassari solitis, pacta talia  
possint inire, & confraternitatem pacisci? Cæterum quia hæc omnia  
politici sunt examinis, ultimæ dissertationis argumento cum aliis re-  
servantur. Illud huc pertinet inquirere; *an Principi liceat, subditis  
invitis, cum Principe tali, sub cuius dominio deterior fortuna subditis  
metuenda, pactum confraternitatis inire?* Non uno hic modo vide-  
tur distingvendum, tum inter Reges ipsos; tum inter illud, quod  
exterior licet, adeoque impune fit, & quod à recti regula exorbitat,  
sive in iusticia interna, strictoque jure, positum sit illud, sive latiora  
æquitatis ac officiorum spacia ingrediatur. Qui regnum aut princi-  
patum in bonis ac patrimonio habent, si naturam dominii nude ac  
in se spectes, quo minus, inconsultis, quinimo nolentibus subditis,  
cum quovis alio Principe hoc modo paciscantur, nihil est hæcenus  
obstaculo. Neque huic paciscendi facultati officit, quod liberi ho-  
mines, quales sunt utique, qui civili imperio, etiam regio, parent,  
non esse dicuntur in commercio; neque enim de hominibus, sed per-  
petuo homines illos regendi jure, quod in commercio esse, nemo

facile negabit, pactum concipitur: adde *Grot. de I.B.I. l. 1. cap. 3. §. 12.*  
Secus vero rem habere cum Regibus ac Principibus illis, qui jure  
non pleno regnant, ipsa juris hujus ostendit natura.

#### XLVII.

Quoad hunc paciscendi actum notanda ulterius insignis illa  
verbi *licere* laxitas. Nonnunquam vox hæc ita usurpatur, ut illud,  
quod pium rectumque est, adeoque divino ac humano jure permis-  
sum, denotet, etiam si forte aliud fieri possit sanctius & excellentius,  
aut certe cum majore apud bonos laude. Cujus exempla *Grotius de*  
*I.B.I. 3. c. 4. §. 2.* ponit matrimonium contrahere, repetere nuptias. *Sic*  
*licet*, inquit, *matrimonium contrahere, sed laudabilior est ex pio propo-*  
*sito celebs castitas, ut ad Pollentium ex eodem Apostolo (Paulum innuit)*  
*differit Augustinus. Repetere quoque nuptias licet, sed laudabilius*  
*est, uno contentum esse matrimonio, &c.* Prius exemplum bene vel  
secus an habeat, nunc non disputo. Posterius etiam tale est, ut suis  
dubiis haud omnino carere videatur. Propius ad rem fortasse facit  
levioris injuriæ condonatio, quam iudicio legitime persequi licebat.  
Deinde licere dicuntur & illa, quæ, quamvis in officiorum, ac pietatis  
regulas impingant, apud homines tamen habent impunitatem,  
vel quod lex aliqua civilis suam ipsis auctoritatem accommodet, quam  
juris licentiam forte non inconcinne dixeris: ad quorum censum  
refero scortationes, latrocinia, furta, nonnullis olim gentibus usita-  
ta ac permissa. Vel quod voluntario societatis jure teneri, aut fo-  
rum sortiri inter homines, se negent, qui in illa societate sunt impe-  
rantes, & in quos proinde judicia cum effectu nequeunt exerceri.  
Quæ meri est facti licentia. Hoc modo Regibus & Principibus omnia  
dicuntur licere, quia sunt ἀντιπρόσωποι, quod novercæ asserenti no-  
luit credere pessimus Imperatorum Caracalla. Hinc etiam fit, ut  
τὸ ἔξόν, & τὸ κατ'ἔκον, id quod licet, & quod decet, ac fieri fas est,  
sepe scriptoribus opponantur. Pulchre *Claudian. 4. Hon. Consul-*  
*atus.*

*Nec tibi quid liceat, sed quid scisse decebit,  
Occurras, mentemque domes, respectus bonæ fidei.*

Adde *Grot. c. 6. l.*

#### XLVIII.

Hoc posteriore significato, quin liceat principi, qui regnum habet in patrimonio, cum extero alio, confraternitatis inire pactum, etiamsi in subditorum suorum detrimentum vergere intelligat, dubitari vix posse crediderim. Verum longe fuerit aliter statuendum, si non tam, quid hoc casu liceat, quam, quid fieri fas sit, bonique Principis officio conveniat, altius inspicias. Si liberet excurrere, de Imperantium & parentum mutua, & ad commune societatis commodum spectante obligatione, pluribus hic posset agi; quæ licet in Principe quidem, præsertim si is *παυβασίλευς* sit, dicatur imperfecta, propterea quod nullum, ut aliqui volunt, detur inter homines forum, in quo Princeps possit à subditis conveniri; tamen in foro conscientie, ut nunc loquuntur, satis est efficax, neque, si Princeps officii fines erga subditos data opera negligat, quin Deum graviter offendat, legesque naturæ violet, quisquam dubitabit. Satisficiant hæc de jure Naturæ.

XLIX.

Voluntarium, quod fecimus, jus, tempus nunc est aggredi; de cujus prima ac nobiliore specie, Divino scilicet, prius est dicendum. Non una est juris Divini apud Scriptores acceptio; quidam ita late sumunt, ut omne, quod Deum habet autorem, jus comprehendat. Sic non nemo legem dividit in divinam ac humanam. Divinam porro in eam, quam Naturæ Deus inscripsit, & eam, quam speciali patefactione (sic loquitur) promulgavit, subdividit. Alius Divinam, ratione promulgationis, in naturalem seu generalem, & positivam seu peculiarem dispefcit. Neutrum, si quid mei est iudicii, satis commode. Licet enim jus illud, quod naturale vulgo vocamus, si quidem primam illius spectes originem, quæ à Deo est, divinum quoque possit appellari, quod & *Grosius* asserit in *Proleg.* §. 1. c. 1. §. 15. de *I. B.* & *P.* diversam tamen à Divino (quale nos intelligimus) speciem constituit, ac unâ pluribus ab illo notis distinguitur, de quibus suse ut agamus, hujus forte loci non est. Nobis igitur hic jus Divinum illud est, quod non à natura ejus, quod vel præcipitur, vel prohibetur, sed à voluntate divina, & ortum & obligandi vim omnem trahit, & sacrosancto Fœderis utriusque Codice continetur. Spectat autem vel cultum divinum, ejusque peculiare aliquos ritus, in populo Dei, certis de



de causis, observandos; vel politicam & quæ huc præterea pertinent; vel res denique singulorum in civitate viventium, privatas, quibus & hereditates omnino veniunt accensendæ.

L.

An igitur & qd. juri divino voluntario vel conveniens sit, vel eidem repugnet confraternitatis pactum, evidentius ut constet, duo prius erunt, sed paucis tantummodo, ac, ut ita dicam, in transitu veluti, perquirenda. Primum est; *quomodo successiones, apud Ebræos, fuerint olim, jure hoc divino voluntario constituta?* Alterum; *quodnam dominium in bona sua jura fuerit, & an alienandi liberam habuerint facultatem?* Non opus est autem, ad recutitæ gentis Magistratos, aut qui ex illis collegerunt, in hoc negotio, nos quidem ut recurramus; E sacro Codice hauriendum est, quod Dei Legislatoris voluntati vere consentaneum dicatur. Duplicis apud Ebræos generis successione facit I. Seldenus de Succession. ad leges Ebræor. l. i. c. i. alteram in bona; alteram in dignitates, Regiam & Pontificiam. Ejus, quæ est in bona, universam quidem materiem cerni, ait, in differentia quintuplici. In successione liberorum, seu rectè descendentium; patris, unde omnis successio à latere pendet; fratris, qui fratrem viduam ex lege duxerit; mariti, seu unde vir; ac fisci: neque ullam, vult, omnino esse in bona successione speciem, de quâ, ex hisce rite cognitis, non facile sit dijudicare. Singulas deinceps species, pluribus capitibus, per totum fere librum latius exsequitur. In gente Israëlita antiqua, quænam debuerit, ex instituto Dei, succedendi esset ratio *Numeror. 27. vers. 8. & seqq.* occasione filiarum Zelophchadi, breviter & eleganter exponitur. Qui locus docet, successione apud Ebræos omnem, aut in bona, saltem immobilia, terræ promissionis (de illis enim quærebatur) legitimam fuisse, ad eamque vocatos primo descendentes; hoc insigni sed tamen discrimine observato, ut post filios demum, & illorum progeniem, quod eleganter ex *Misibna tit. Baba Bathra c. 8.* ostendit c. a. c. i. Seldenus, filia admittentur. Quod si nullam omnino prolem defunctus reliquisset, agnatis juxta proximitatem gradus, ex lege successio deferebatur. Primus ordo fratrum fuit; hos exceperunt patris fratres: ita enim LXX. Interpp. originali textui inhærentes, reddiderunt. *Εάν δὲ μὴ ᾖσιν αὐτῷ ἀδελφοί, δώσει τὴν κληρονομίαν αὐτῇ τῷ ἀδελφῷ τῷ πατρὸς αὐτῆς.* Post patruos admis-

admissi proximiores agnati quicumque ; Εὰν δὲ μὴ ὦσιν ἀδελφοί,  
dicunt iidem , τῷ πατρὶ αὐτῶν , δώσατε τὴν κληρονομίαν αὐτοῦ  
τῷ δικαίῳ τῷ ἑγγίσι αὐτοῦ ἐκ τῆς φυλῆς αὐτοῦ.

## LI.

Ex hisce apparet, duplicem fuisse antiquitus, in populo isto  
successionem ; primam quidem descendantium ; alteram agnatorum,  
quos, exclusis cognatis, solos, post descendentes, hereditatem cre-  
visse, locus hic indicio est. Duabus istis successionum speciebus, de-  
scendentium videlicet, ac à latere venientium agnatorum, tertiam  
sed intermediam addunt nonnulli, nimirum ascendentium, patris ac  
avi, & sic deinceps. Nullam apud *Moysem*, *laudato antea capite*, ne-  
que patris, neque ascendentium aliorum, ad quos, à liberis, hereditas  
ac bona, devolvantur, fieri mentionem expressam, certissimum est ;  
sequitur ergò, hanc ascendentium successionem non ex ipsa lege sa-  
cra, sed gentis istius magistrorum interpretatione, potius descendere.  
Cur autem patris nomen fuerit omissum, *audere aliquos rationem*  
*afferre*, dicit *Seldenus* c. 12, citat *R. Bechajum ad b. l. fol. 193. col. 2.*  
*Et Philon. de vita Moyse* 13. cujus posterioris verba elegantem  
continent rationem, cur patres in hac successione, neque potuerint  
omnino neque debuerint omitti. Verba ex ipso *Philone*, plenius  
paulò recitata sic habent : Μετὰ δὲ θυγατέρας, τρίτους ἀδελφὸς  
καλεῖ, καὶ πτέρησιν δὲ θείοις πρὸς πατὸς ἀντίκειναι τὰς αἰνι-  
γόμεναις ὅτι καὶ πατὸς (rectius πατερες alii substituent) γίνο-  
νται ἂν ὧν κληρονόμοι. Πάνυ γὰρ εὐηγεῖς, ὑπολαβεῖν, ὅτι πα-  
τὸς ἀδελφῶν νέμωι κληρον ἀδελφίδι, καὶ τὸ πρὸς τὴν πατέρα συ-  
γνέσκειν, αὐτὸν ἀφείλετο, τὴν πατέρα δὲ λαδοῦσιν. Ἀλλ' εἰπωμένη  
ὁ νόμος φύσικώς ἐστι, κληρονομεῖσθαι τὸς γονεῖς πρὸ πατέρων, ἀλ-  
λά μὴ τῶν κληρονομεῖν, ὅ μὲν ἀπενεκλαῖον καὶ παλὶν φημον  
ἡσυχασιν, ἵνα μὴ πατὴρ καὶ μήτηρ προσοδεύεσθαι δοκῶσι ὅτι ὅτι  
ἀκυρότοις τέκνοις ἀπαρηγόρητα πείνη ; πλαγίως δ' αὐτὸς ἐκά-  
λεσε τοὺς θείους εἰσφέρειν, ἵνα καὶ ἀμφοτέρως σοχάσθαι, καὶ τῷ πρέ-  
ποντι, καὶ τῷ μὴ τὴν ἑστίαν ἀλλοτριωθῆναι. Μετὰ δὲ θείους, κέμ-  
νη ὅτι οἱ ἐγγίσι γίνεσθαι, ἂν αἰεὶ τοῖς πρώτοις δίδωσι τὸς κληρε-  
τας.

Patres

Patres igitur fratribus haud dubie suere prælati, unico duntaxat excepto casu, si fratris defuncti viduam ducere, fratrique nomen suscitare, ἀναστῆσαι τὸ ὄνομα τοῦ ἀδελφοῦ αὐτοῦ, vellet. Hæc de successione, apud Ebræos, pauca præsentī negotio sufficiunt; plura vide apud *Seldenum c. l.* cum primis vero *c. 13.* in quo *omnigena* (sic loquitur) successione, quæ ex jure sanguinis pendet, exemplum proponit; nos enim filum heic abrupimus, & quæ de toto hoc successione negotio latius differi poterant, tanquam instituto parum profutura, & ne nimis excreseat dissertatio, consulto omittimus.

## LII.

De jure, dominis in bona sua competente, pauca, restat, ut proferamus. Legitimi & ab ipso Deo injuncti belli jure, optimo sane dominii acquirendi titulo, quæsitam, perque tribus undecim sorte distributam postea populo Israelitico terram sanctam, sacra testis est historia. Bellum verò istud, uti totius populi fuit auspiciis gestum, ita non ejusdem Ducibus aut Principibus, sed ipsi populo, ejusque imperio, & jure quidem plenissimo, capta bello cesserunt. Hæc enim belli natura est, ut per illud occupata & acquisita, non deminuto aut restricto, sed absoluto capientium arbitrio subjiciantur. Ex quibus in promptu poterat videri colligere, plenam, & quoad omnes illos, in quibus dominii sese effectus exserunt, actus perfectam, circa res suas, tribuendam dominis in populo Israelitico facultatem. Cæterum cum divinitus constitutæ istius Reipubl. supremum & Legislatorem & Præsidem se gesserit Deus Opt. Max., cujus in gerendo bello ductum & auspicia sunt secuti, & sub cujus tutelari Numine formidabiles hostium turmas devicerunt Israelitæ; quantum in bona ista, cum primis vero, quæ soli aut immobilia dicuntur, juris concedere dominis istis Deus voluerit, è sacro legum Codice est eruendum. Elegans hanc in rem locus est *Levit. c. 25. v. 23.* quem è versione *LXX. Interpp.* huc apponere placet: Καὶ ἡ γῆ, inquit DEUS, ὡς παραθήσεται εἰς βεβαίωσιν, ἐμὴ γὰρ ἐστὶν ἡ γῆ, διότι προσήλυτοι καὶ παύροικοι ὑμεῖς ἐστὲ ἐναντίον ἐμοῦ. Quæ verba penitus inspecta duos nos docent: Primum est; non tam proprietarios, quam Dei colonos potius ac velut Emphyteutas fuisse Israelitas. Alterum, quod per pronam tamen consequentiæ viam è primo deducitur, nihil eos bonorum

norum suorum vere potuisse alienare. Vere inquam; quia sub redemptionis lege & conditione fieri venditionem oportebat. Quinimodum cum duæ sint partes dominii, ut loquuntur, constitutivæ, proprietas videlicet, ac ususfructus, hunc verius quam illam, emptori concessum fuisse, non inepte quis existimaret.

#### LIII.

Notandum cum primis attamen hic venit, inter bona mobilia & immobilia, quoad hanc alienandi facultatem, discrimen insigne. Bona mobilia, illa præcipue, quæ sua quis industria quæsierat, aliquo potuisse casu, etiam post latam à Moyse legem alienari, vendi, donari, pluribus ex historia sacra deductis poterat exemplis probari. Circa bona immobilia distinguendum est, inter prædia soli, & prædia solo cohærentia. Prædia soli, qualia sunt, fundus, ager, vinea, &c. quæ rusticorum nomine JCeis, in servitutum materia, veniunt, per legem divinam alienari prohibebantur; quod spectat illud Nabothi ad Achabum: μή μοι ἡμοῖο πρὸς κύριον, δῆναι τὴν κληρονομίαν τῶν πατέρων μὲν σοί. *Prohibeat hoc à me Jehouab, ut dem hereditatem patrum meorum tibi!* Noverat nimirum vir pius, id genus alienationes lege divinâ usque adeo improbari, ut ne melioribus quidem conditionibus (meliozem namque aliam, sive vere, sive simulate, Rex offerebat) alienationi adjectis, fieri, salva lege possent.

#### LIV.

Cur autem prædia ejusmodi vendi, aut alienari noluerit Deus, præter alias, potissimum duas invenio causas: Prima est; quia fieri hoc pacto facile potuisset, ut ab una tribu ad aliam bona transferrentur, quod modis omnibus præcautum voluit Deus; Et hæc eâdem de causa non licuit filiabus Ἀπικλήρις enubere in tribum alienam. Numeror. 36. v. 6. & 7. Τῷ τὸ ῥῆμα, ὃ συνέταξε κύριος τοῖς θυγατέρας Σαλπαὰδ, λέγων, ὅτι ἀνδρέσκει ἐναλίον αὐτὴν, ἔσωσαν γυναῖκες, πληὴ ἐκ τῶν δέμων ἔτι πατέρας αὐτὴν ἔσωσαν γυναῖκες; καὶ ἔτι περὶ τῆς φήσεως ἡ κληρονομία τοῖς υἱοῖς Ἰσραὴλ, διὰ Φυλῆς Ἀπικλήρις, ὅτι ἕκαστος ἐν τῇ κληρονομίᾳ τῆς φυλῆς τῆς πατρικῆς περιεκολληθήσεται οἱ υἱοὶ Ἰσραὴλ. Quem locum variis interpretationibus, ut fit, divexant Magistri. Plerique legem hanc de mutuis tri-

buum nuptiis interdictis, non perpetuam, sed temporalem dūtaxat, & vique brevis faciunt, & ad dividendæ terræ promissæ tempus restringunt; vide quæ tradit *Seldenius cap. 18.* laudat *Misnam & ueramq; Gemaram, Eusebium, Hieronymum, Andronicum Cplitanum, Lyranum ad Numeror. 36, Thomam, Baronium, Ludovicum Molinam, Casaubonum &c.*

#### LV.

Altera causa est, quia prædia hæc partem constituebant terræ sanctæ, cujus possessionem quidem, in quam stupendis miraculis velut advenæ & coloni fuerant inducti, Israëlitis Deus concesserat; directum vero ac superius dominium sibi reservarat, quod ex *ante laudato Levit. loco* luculenter apparet. Secus fuit circa prædia solo coherentia constitutum. Prædia solo coherentia voco ædificia quocunque loco posita, quæ urbanorum nomen, in materia de servitutibus, maxime apud Romanos, obtinuerunt *JCtos, §. 1. Instit. de servit. l. 1. ff. Commun. pred. l. 198. de V. S. l. 20. §. 1. l. 21. l. ult. ff. de S. U. P.* Circa prædia hæc quid lex divina caverit observandum, *Levit. c. 25. v. 29. & seqq.* exponitur; quo loco distinguitur I. inter domum urbanam, οἰκίαι οἰκηθῆν ἐν πόλει τετραχισμένη, & domum paganam, ἐν ἐπαύλεισιν, αἷς οὐκ ἔστιν ἐν αὐαῖς τετραχισμένη, ut Hellenistæ reddiderunt. II. Inter domum communem seu Laicorum, & *Leviticam. vide passim Interpp.*

#### LVI.

Hucusque pro instituti ratione breviter dissertata, nos ed ducunt, ut intelligamus, & circa hereditates plus potuisse scriptam legem divinam, quam privatorum voluntatem, & illud, quod in bonæ præprimis verò immobilia, competebar, jus, multis fuisse modis restrictum. Quæ cum ita sint, pacta confraternitatis, à diversarum familiarum aut tribuum personis, illustribus etiam, iniiri nequaquam, tum quidem, salvo jure hoc, potuisse, satis sit exin perspicuum. Quo autem jure regnum Reges habuerint, priusquam pedem promoveamus, verbo est edisserendum. Faciem præfert S. Scriptura, quando I. *Samuel. c. 8. v. 4. & seqq.* docet, quomodo per improbitatem filiorum Samuelis factum sit, ut regiminis Aristocratici, quale sub Judicibus hæcenus obtinuerat, petæsus populus Israëliticus, Regem sibi postulat, &



larit, iis conditionibus ac illo jure, quo Regibus sanctæ gentes finitima, sub asperiore unius dominatu, tum temporis vivebant. Quis verborum Prophetæ sit sensus *vers. 11.* Regiæne potestatis jura ac δικαιώματα, quâ voce LXX Interpretes utuntur, describant, an de nudo, quod aliis placet, facto, aut jure usurpato, veniant intelligenda, ac meri adeo sint despotici dominatus emblemata? certant eruditi; quam litem ut hic faciamus nostram, præsens non patitur argumentum. Nora sunt volumina, noti scriptores, interque plurium manus versantur, quibus in utramque partem lis fuit isthæc agitata. Nobis id locus iste penitus inspectus indicat, futuri Regis potestati ita se submisisse populum, ut nihil exciperetur.

#### LVII.

Tales vero Principes, cum pleno proprietatis jure regna possideant, alienandi jus etiam habere, supra diximus. Verum enim vero, quamvis omnia hæc ita se fortasse habeant, alienandi tamen, aut confraternitatis pactum, de quo nobis hic quæstio est, cum principibus exteris ineundi jus non habuisse populi Israelitici Reges, duæ potissimum rationes evincere mihi videntur. Prima est, quod superius ac directum dominium, ut ante dictum, Deus in terram sanctam sibi soli reservasset. Altera; quod hoc fieri pacto facile potuisset, ut Regi alienigenæ populus Israeliticus subjiceretur, quod legi divinitus datæ *Deuteron. 17. v. 15.* fuisset è diametro adversum. Dictum de jure divino voluntario satis ex instituto.

#### LVIII.

Restat altera Juris voluntarii species, quod singulorum populorum civile vulgo vocamus. Multiplex id esse, & ex unaquaque civitate appellari, ac apud gentes alias aliud obtinere, πολυθευήλων. Arcta nobis adeo est illius significatio (nequis morationum gentium omnium leges civiles, quæ nec unius hominis comprehendi capacitate possunt, excussuros nos existimet) ut solum denotet Romanum; quod, quoties non additur nomen, cujus sit civitatis, civile καὶ ἑξοχόν, Romanis præsertim] Cuius dici §. 2. *Instit. de J. N. G. C.* neque nostri amplius dupondii ignorant. Huic Juri Rom. Civili, si nostrum spectes Imperium, Jus Pontificium, Recessus seu Constitutiones Imperii, moresque & consuetudines tacito consensu paulatim

& progressu temporis introductæ porro accensentur; utq; Romanorum civile & Pontificium, precaria magis, quam sua, fulgeant auctoritate. Romanarum legum (illæ namque primum sibi locum deposcunt) scitis omnino refragari confraterniteto, & à communibus *juris istius regulis*, ut nonnemo loquitur, *exorbitare*, communis est Dd. sententia; ad quam confirmandam, plurimos adducunt textus, *l. 4. C. de inus. stip. l. 61. ff. de V. O. l. 16. ff. de suis & leg. her. l. 5. C. de pact. conv. l. 15. l. 19. l. 30. C. de pact. l. 3. C. de Collat.* quibus legibus de futura succellione, sive acquirenda sive repudianda pacisci, civibus Romanis interdicitur. Prohibitionis hujus adduntur à quibusdam rationes, è legum, vel verbis, vel argumento, deductæ; in quas ordine prius recensitas, inquirere paulo intimius libet.

#### LIX.

Prima est, quod confraternitatis pactum *captanda mortis alterius votum inducat*. Alter; quod *libertati testandi intercedat*. Tertia; quod sit *contra bonos mores, ac plenum tristissimi ac periculosissimi eventus*. Quarta; quod, *quemadmodum accipiendi dominis & obligationum, sic hereditatis quoque certi sint modi, voluntas nimirum domini testantis, & lex aliqua, sive naturalis, sive civilis*. Singulæ pensus nunc considerandæ. Primam, quæ captandæ mortis alienæ votum obtendit, *ex l. 11. C. de Transact.* probare communiter consueverunt. Quam bene vel secus, sequentia facient manifestum. Agit dicta modo lex undecima de fideicommissis inter fratres reciproco, & eundem fere casum, quem lex decimasexta *C. de pact.* exhibet. Casus hic est: Pater duos relinquit filios, eosque testamento scribit heredes, adjecto hoc fideicommissi onere, ut prior absque heredibus decedens, suam partem alteri restituat. Oritur exinde dubium; an fideicommissum hoc conditionale & reciprocum, contra voluntatem testatoris expressam, mutuo remittere sibi possint heredes? Rescribunt Imperatores, ratam esse transactionem, cum fratrum concordia, remoto captandæ mortis alterius voto improbabili retinetur. Non de pacto successorio reciproco, sed repudianda hereditate, legem esse conceptam, quis est, quæso, qui non videat? Nec sequitur: fideicommissi reciproci mutua remissione tollitur invisum captandæ mortis alterius votum, ergo per mutua successionis pactum inducitur. Pacti hujus successorii quis sit finis, dissertatio prima dilucide satis exponit, quæ captandæ

mortis

mortis aliēnz voto directe adversantur. Adde, quod nondum satis probari videatur, id genus fideicommissis, aut hereditati pactitiā, magis quam aut testamentariā aut legitimā, votum caprandā mortis alterius adharere. Per accidens, ut Philosophorum scholā loquuntur, id fieri, recte quis objiceret; quo argumenti genere si pacta successoria liceret impugnare, contra testamenti factionem & legitimas successiones omnes, non minus id quoque valeret. Quid testatōros olim in Rep. Romana permoverit, ut, quod *ἡμετέριον* Plutarcho de *sem Numinis vindicta* visum, ab herede alium familiā constituerent emptorem, qui heredi seorsim in tabilis testamenti scripto, post mortem testatoris, familiā, ut manceps fiduciarius, remanciparet, in Jure & antiquitate Romana hospitis esset ignorare. Ut adeo, siquidem vera sunt, quæ à nobis hic dissertata, pactis ejusmodi successoriis caprandā mortis alterius votum objici frustra videatur.

### LX.

Aceusant porro confraternitatem, quod testandi impediāt libertatem: allegant *l. 1. C. de pact. conv.* & *l. 15. C. de pact.* Prima, quam adducit *Hermes in Fasc. Jur. Publ. c. 14. n. 49.* nihil prorsus huc facit: Agit de pacto doti adjecto servando, cui gemina plane est *l. 10. C. de pact.* adde *Barbos. in Collect. ad b. l.* Miror judicium Auctoris, nī aliorum, ut sit, vestigia sit securus. Alterā hanc continet quæstionem: *an de futura in æquas portiones filia successione conceptum, & domi instrumento comprehensum pactum, testamenti faciendi libertatem auferat?* quod negatur. Nulla additur in lege ratio; assignant alii hanc, quod pacto fieri nequaquam possit, ut testandi facultas adimatur, quam qui *ex l. 1. C. de SS. Eccles.* quod nonnemo facit, elicere vellet, ineptus esset merito dicendus. Pacti successorij in lege hæc ne *ἔξω* quidem habetur; neque magis faciunt *l. 4. & 17. ff. de adim. leg.* Libera est ac ambulatoria hominis voluntas, nec quicquam prohibet, priorem scripturam posteriore corrigere, dummodo libertati huic non injiciat fœcenum, aut lex, aut pactum jure validum, cum alio initum. Non omnem testandi libertatem confraternitatis pacto rolli, supra diximus. Et quid si vel maxime tolleretur? Ergone quicquid liberam testandi facultatem adimit, improbandum statim erit? Improbandæ fuerint igitur omnes, quotquot istam libertatem vel

omnino tollunt; vel ad certa saltem bona restringunt, leges plurimorum populorum civiles. Improbanda (quod absurdum) ipsius Dei de successione, quam legitimam fuisse pene omnem, superius ostensum, populo Israelitico data legislatio.

### LXI.

Contra bonos mores, & plenum tristissimum periculosissimique ventus esse confraternitatis pactum, dicunt. Sed quomodo, vel unde quæso probant? Adducitur *lex 4. C. de inutil. stip. & lex fin. C. de pact.* Prior interpositam de successione futura stipulationem contra bonos mores esse dicit. Verba legis hujus dextre sunt accipienda, quidque per bonos mores intelligi debeat, sedulo investigandum. Non placet *Sichardus ad C. de Pact. n. 8.* ubi dicit; aliter accipi bonos mores in Jure Civili, aliter in Jure Canonico. Jure Civili, quicquid est contra publicam utilitatem, etiam indirecte, improbum & contra bonos mores haberi: exempla facit donationem inter patrem & filium in potestate constitutum, donationem inter virum & uxorem, constante matrimonio *l. 1. ff. b. t.* De Jure autem Canonico illud tantum contra bonos mores dici, quod inducit peccatum; laudat pro se *Baldum b. t. in l. pactum quod dotali 19. qu. 1. de Collat.* Rectius, quinimo textibus juris longe convenientius ita rem proponi crediderim; *enim* hanc duobus intelligi modis posse, proprie scilicet ac improprie. Priore modo accepta, disconvenientiam, ab eo, quod necessitatem in se continet moralem, significat. Ita moribus prohiberi dicuntur illa, quæ jure gentium, h. e. naturali in veritum eunt *l. 8. § 1. 39. §. 1. ff. de R. N. l. 1 §. ff. de condit. Instit.* Hoc significatu contra bonos mores esse confraternitatem, nemo sanus dixerit. Altera *Pegiorac* hujus acceptio est impropria, quæ contra bonos mores esse dicuntur, quæ lege aliqua civili sunt prohibita; & hoc sensu Diocletiano & Maximiano Imp. prædictæ legis autoribus sumi videtur; nisi quis votum captandæ mortis alienæ ante oculos habuisse Principes, velit divinare. Dicta igitur *lex 4.* nihil aliud hætenus dicit, quam initam de futura successione stipulationem, certis tantummodo casibus, de quibus infra, exceptis, civili jure prohiberi, aut futuram in bona alterius successionem in pactum deduci non posse, quod nemo inficias temere iverit. Notandum porro est, dictam legem quartam de successione unilate-

re,

re (liceat ita nunc loqui) intelligendam, ac presenti adeò negocio, vix esse, ut tuto possit applicari.

#### LXII.

Posterior lex, quæ est *ultima C. de pact. odiosas & tristissimi ac periculosissimi eventus* plenas proclamat de futura successione aut hereditate pactiones. Cæterum nec illa probe intellecta huc potest referri. Casus legis hic est: Duo pluresve de futura, tertii adhuc viventis, quam sperant, hereditate, ex cognatione forte ad illos devolvenda, deque certis modis in eadem hereditate observandis, paciscuntur. An valeat pactum quæritur? Negat Justinianus Imp. additis rationibus: unicum tamen hunc excipit casum; nisi tertius ille, de cuius hereditate agitur, suam paciscentibus voluntatem accommodaverit, inque eâ, ad extremum vitæ suæ spacium, perseverarit, cum talis consensus caprandæ mortis alterius votum tollat. At verò, in pacto confraternitatis, non agitur de hereditate tertii, pacto non comprehensi; sed ipsi paciscentes de bonis suis paciscuntur. Quod si jam de successione tertii alicujus pacisci, dummodo voluntatem suam is accommodet, permissum est; quanto magis dominis, de re sua, in demortuæ stirpis alterius casum, constituentibus, poterat videri hoc permitendum.

#### LXIII.

Quod de modis acquirendæ hereditatis duobus ordinariis ex *l. fin. ff. de suis & leg. her. & §. ult. Instit. per quas pers. acq.* nonnulli denique asserunt, leviculum sane est; neque enim, quod extraordinarium est, hoc ipso statim legibus est prohibitum. Quod si in vim ultimæ voluntatis, ut nonnulli volunt, pactionem talem valere statuas; duarum familiarum, quæ, ut duæ personæ morales, in hoc actu spectantur, mutuum & reciprocum, irrevocabile tamen, habeatis quasi testamentum. An igitur & q. juri civili confraternitas adversetur, ex hæcenus dictis perspicere, fuerit, sic opinor, cuivis in facili.

#### LXIV.

Num vero possit juramento confirmari, disceptandi nonnullos. subit lubido. Negantibus ad stipulatur *Limneus de l. P. l. 4. c. 8. n. 133.* citat pro sua sententia *Zasium ad l. 61. ff. de V. O. n. 48. & Sicbard. ad l. 3. C. de Collat.* cum quibus etiam facit *Daniel Otto l. P. c. 11.* Quæ consue-



consequentia lege ex adductis textibus id colligant, ipsi viderint. Argumentis legum certare, suis non caret dubiis & difficultatibus. Jure Civili non illam esse juramentis vim tributam, ut pactis jure alioquin invalidis robur aliquod addant, plus quam est notissimum. Secus tamen res habet, si de jure Pontificio quæras, *c. 2. ext. de pact. in 6.* ubi repudiandæ hereditatis pactum juramento dicitur firmari.

### LXV.

Illud paucis prius addendum, quam hinc porro progrediamur, casibus aliquot permissam jure Rom. civili, de tutura successione acquirenda pactionem. Primus est in *l. 3. §. 2. ff. pro socio*, ubi de hereditate tertii, incerta & dubia, quam in societatem bonorum omnium universalem venire, deque ea pacisci licere, Paulus J.C. responder, specialis proponitur casus, qui licet huc proprie non spectet, hoc tamen probat; de hereditate futura permissum esse, quandoque pactiones inire. Alterum *lex 19. C. de pact.* exhibet, quo militibus ad prælii discrimen pergentibus, ob communem mortis fortunam, paciscendi invicem licentia, Principalium constitutionum propro favore (sic loquuntur Imperatores) conceditur; *vide præter Gotb. in not. marg. Barbof. & Brunnem. ad d. l.* Quomodo pro confirmando confraternitatis, inter Principes, Germaniæ præsertim, pacto, Doctorum nonnulli lege hac abutantur, ex illis, quæ de jure militari quamplurimis tantopere jactato, *dissert. 1.* dixi, non potest esse obscurum. Pacti hujus militaris à nostro discrimen exin manifestò dignoscitur, quod in vim ultimæ voluntatis valeat, sive, ut Imperatori loqui placet, *vim postremi judicii obtineat*, ac ante mortem proinde sit revocabile, neque liberam testamenti faciendi impediat facultatem. Tertius est *legis ultima C. eod.* quam paulo ante paucissimis ex instituto dedimus explicitam. Dicta hæc de jure Rom. civili in præsens ita sufficiant.

### LXVI.

Per Germaniam quo jure primitus invaluerint, inter familias Principum illustres pacta confraternitatis, *dissert. 1.* fuit indicatum. De requisitis etiam, tam essentialibus, ut loquuntur, quàm quæ per accidens insunt, *eadem dissert.* prolixius est expositum. Restat hic unicum duntaxat inquirendum; *an hodierno adhuc tempore pacta hæc inter Principes Germanos, aut exteros Imperii cives, de novo inveniuntur, solius*

*soli Imperatoris confirmatio reddat valida; an vero Statutum, & cumprimis Electorum consensus insuper sit necessarium? Non exigui ponderis esse quæstionem, dicit Gutsch. de Confr. tb. 6. lit. a. illius vero decisionem dependere ait à decisione hujus: An nimirum Imperator, hodiernis moribus, possit de feudis, Imperio apertu, alios rein feudare? Laudat Bocer. de Regal. c. 2. n. 61. & c. 4. n. 15. Bornis. de fund. stat. Reip. c. 27. Rosensb. de Feud. c. 5. concl. 12. n. 4. communī & veteri insistentes regulæ. Quod quilibet dominus feudi, rem sibi apertam denuo alii concedere possit; decidunt etiam, Imperatorem adhuc hanc habere potestatem, cum ipsa in hoc nondum sit restricta, non obstante Capit. Caroli V. apud Sleid. l. 1. In contrariam mox opinionem ipse descendit. Cæterum quid opus erat tanto conatu? Plana, neque ullis implicita difficultatibus res est; quod jam dicenda facient manifestum.*

#### LXVII.

Cumprimis autem probe hic attendendum τὸ πρῶτον: controversia non est, de Statibus sive Principibus confœderatis, h. e. illis, qui eo pacto possunt lædi, quorum consensum omninò necessarium esse, extra certaminis discrimen pono. Sed neque rationes desunt, è confraternitatis effectibus petendæ, nec exemplum, quod pactio Saxonicæ-Hennebergicæ suppeditat, in quâ confœderatæ Domus Hassiacæ consensum fuisse requisitum, scriptorum testimoniis certum est; *vide Muscul. tb. 51. Reusner. Vol. 1. Conf. 3. n. 48.* Neque confundendæ sunt etiam diversæ quæstiones, quarum altera de bonis vacantibus & caducis, altera de feudo olim vacaturo concepta est, neque hujus decisio ex alterius decisione, ut male censet Gutsch. c. 4. l. ultatenus dependet. Quam fuerit omninò ad ingundas confraternitates, confirmatio Cæsaris olim necessaria, *disfert. 1. ostendimus*, quæ sola aut omiſſa, aut denegata, pactum facit ipso jure nullum. Deo negatæ confirmationis exemplum ponit *Limneus l. 4. c. 8. n. 176.* Neque requisitis ad pacti validitatem necessariis, aut Statutum aut Electorum consensum, ab ullo scriptore videas accenseri. Et ita ad Maximiliani I. Cæsaris usque tempora res sese, dubio procul, habuit.

#### LXVIII.

Postea lege Germanorum regia, seu per Capitulationes Imperatorias, aliud constitutum nonnulli putant. Defendendæ huic sententia

centiæ patrociniæ quærent & Capis. Caroli V. art. 24. quam compendio contractam l. 1. de stat. relig. & Resp. Sleidanus exhibet, Ferdinandi I. art. 22. & 23. Rudolphi art. 12. Matthei art. 29. Verum omnes hosce textus, de bonis vacantibus, & quocunque modo, siue refutatione, siue delicto, aut morte vasalli, Imperio apertis, loqui, verba adeo clare testantur, ut jure mireris, quid Buxtorffius, Asumæum & Limnaum movere potuerit, ut erroris, nescio cujus incusarint Bocerum de Regal. c. 2. n. 61. & c. 4. n. 15. qui Capitulationis Carolinæ articulum 24. de bonis vacantibus accepit. Neque compendiosa Sleidani versio ut ex Buxtorffio vult Gutsch., & adstipulatur Limnaus, Bocerum decipit. Ipsa lubet verba huc apponere: Wann auch Lehen dem Reich und Uns bey Zeiten Unser Regierung eroffnet / und leediglich heimfallen werden / &c. Quæ posteriora verba satis indicant, de bonis vacantibus (Græci vocant ἀέωστα) dictam capitulationem intelligendam, neque aliter interpretari illa potuit ipse sui immemor Limn. in Annot. ad art. 24. Capis. Carol. verbo leediglich heimfallen / citat A. B. c. 7. §. ult. Quod autem de usufructus feudalis consolidatione cum directo dominio Imperii, textum intelligi debere, vult idem, verbo Lehen / ad rem parum, ne dicam, nihil confert. Præterquam enim quod abusufructu feudi natura longe distat, titulo perpetuo, & adversus ipsos directos dominos vindicandi jure, gaudens, nemo temere dixerit, pactiōis ineundæ tempore, bona, de quibus futuri confratres paciscuntur, imperio vacare. Cassum itaque præsidium est, quod occupat Limnaus: nec enim sequitur; de feudis, Imperio apertis, & vacantibus, pro lubitu non potest disponere Imperator, ergo de nondum vacantibus inita à Principibus pacta confirmandi jus quocunque nullum habet.

## LXIX.

Placet in hoc negotio, quod crebro nimis sermone aliàs nostri usurpant Jcti, *erubescendum sine lege loqui*. Enimvero, si illa, seculis fere antiqui usitata, solius Imperatoris confirmatio, lege aliqua postmodum fuit restricta, sequitur, illam restrictionem in lege contineri vel κατὰ τὸ πρῶτον, ut loquuntur, vel κατὰ τὴν Νέωσαν. Prius, citra temeritatis notam, nemo tam audax est, qui contenderit. Posteriorius


fierius vero solidioris consequentiæ legibus est evincendum; quod  
 qui fecerit, hæcenus vidi neminem. Quod itaque mutatum non est,  
 cur stare prohibeatur? Præterea, quod vel cumprimis observandum,  
 & maximi in hac controversia momenti est censendum; annon Ca-  
 rolus V, irrequisito Electorum & Statuum consensu, pactam inter  
 Saxonas & Hennebergicos confraternitatem, anno seculi superioris  
 post quinquagesimum quinto confirmavit? Ubi igitur exempla, re-  
 rumque adsunt testimonia, quid opus est verbis? Accedit denique,  
 quod illa scriptorum nonnullis tantopere jactata, de reducendis ad  
 patrimonium Imperii publicum, feudis hoc modo vacantibus, consti-  
 tutio, ad præsens usque tempus, ne unico quidem potuerit actu in  
 praxin vocari, satente, ac insignibus exemplis duobus declarante ipso  
*Limnao ad d. capit. art. 24. verbo behalten.* De Wilhelmi Julia-  
 censium Ducum ultimi bonis Imperio vacantibus, qui fuerint exorti  
 hoc seculo tumultus, in recente est omnibus memoria. Frustra igitur  
*Guttichius*, & qui cum eo faciunt, *Limnaus c. a. l. & Carpzov. ad*  
*l. Reg. c. 6. f. 7. n. 89.* ad legem, quæ usu nunquam obtinuit, pro de-  
 cidenda hac lite, provocant; neque, quo minus sola Imperatoris  
 confirmatione talia pacta adhuc hodieque valida reddantur, quic-  
 quam videtur hæcenus obstare.

## LXX.

Quæ cum ita sint, nova illa de Electorum, aut reliquorum etiam  
 Imperii Statuum, consensu, cautela non opus habebunt pacturi, nisi  
 forte cum *Carpzovio c. a. l.* dicere velis: tutius agere Principes, de su-  
 zura successione invicem paciscentes, si desuper non solum *Casaris con-*  
*firmationem, sed & reliquorum Imperii Statuum, vel saltem Archi-*  
*Principum Electorum consensum & approbationem requirant.* Quod  
 ipsum cum magis sic honestatis, quam præcisæ necessitatis, magisq;  
 consilii quàm præcepti, hic in controversiam vocare, nihil ad rem  
 attinet. An igitur & qd. juri, tam naturali, quam voluntario con-  
 veniat confraternitas, ex his perspicuum est. Atque sic  
 finitum esto Themidos examen.

35(0)55

✠



...the ... of ...  
...the ... of ...  
...the ... of ...  
...the ... of ...

...the ... of ...  
...the ... of ...  
...the ... of ...  
...the ... of ...

...the ... of ...  
...the ... of ...  
...the ... of ...  
...the ... of ...

...the ... of ...  
...the ... of ...  
...the ... of ...  
...the ... of ...

...the ... of ...  
...the ... of ...  
...the ... of ...  
...the ... of ...

...the ... of ...  
...the ... of ...  
...the ... of ...  
...the ... of ...

...the ... of ...  
...the ... of ...  
...the ... of ...  
...the ... of ...

...the ... of ...  
...the ... of ...  
...the ... of ...  
...the ... of ...